



列傳第二十九

魏書四十一

源賀

源賀自署河西王禿髮傉檀之子也傉檀爲乞伏熾磐所滅賀自樂都來奔賀偉容貌善風儀世祖素聞其名及見噐其機辯賜爵西平侯加龍驤將軍謂賀曰卿與朕源同因事分姓今可爲源氏從擊叛胡白龍又討吐京胡皆先登陷陳進號平西將軍世祖征涼州以賀爲鄉導詔問攻戰之計賀對曰姑臧城外有四部鮮卑各爲之援然皆是臣祖父舊民臣願軍前宣國威信示其福禍必相率歸降外援旣服然後攻其孤城拔之如反

掌耳世祖曰善於是遣賀率精騎歷諸部招慰下三萬餘落獲雜畜十餘萬頭及圍姑臧由是無外慮故得專力攻之涼州平遷征西將軍進號西平公又從征蠕蠕擊五城吐京胡討蓋吳諸賊皆有功拜散騎常侍從駕臨江爲前鋒大將賀爲人雄果每遇彊寇輒自奮擊世祖戒之曰兵凶戰危不宜輕犯卿可運籌處分勿恃身力也賀本名破羌是後也世祖曰人之立名宜其得實何可濫也賜名賀焉拜殿中尚書南安王余爲宗愛所殺也賀部勒禁兵靜遏外內與南部尚書陸麗決議定策翼戴高宗令麗與劉尼馳詣苑中奉迎高宗賀守禁

中爲之內應俄而麗抱高宗單騎而至賀乃開門高宗卽位社稷大安賀有力焉轉征北將軍加給事中以定策之勲進爵西平王高宗卽位班賜百寮謂賀曰朕大賚善人卿其任意取之勿謙退也賀辭固使取之賀唯取戎馬一疋而已是時斷獄多濫賀上書曰案律謀反之家其子孫雖養他族追還就戮所以絕罪人之類彰大逆之辜其爲劫賊應誅者兄弟子姪在遠道隔關津皆不坐竊惟先朝制律之意以不同謀非絕類之罪故特垂不死之詔若年十三已下家人首惡計謀所不及愚以爲可原其命没入縣官高宗納之出爲征南將軍

冀州刺史改封隴西王賀上書曰臣聞人之所寶莫寶於生全德之厚者莫厚於宥死然犯死之罪難以盡恕權其輕重有可矜恤今勅寇遊竟於北狡賊負險於南其在疆場猶須防戍臣愚以爲自非大逆赤手殺人之罪其坐贓及盜與過誤之愆應入死者皆可原命謫守邊境是則已斷之體更受全生之恩徃役之家漸蒙休息之惠刑措之化庶幾在茲虞書曰流宥五刑此其義也臣受恩深重無以仰答將違闕庭豫增係戀敢上瞽言唯加裁察高宗納之已後入死者皆恕死徙邊久之高宗謂羣臣曰源賀勸朕宥諸死刑徙充北蕃諸戍自

爾至今一歲所活殊爲不少生濟之理旣多邊戍之兵有益卿等事朕致何善意也苟人人如賀朕治天下復何憂哉顧憶誠言利實廣矣羣臣咸曰非忠臣不能進此計非聖明不能納此言賀之臨州鞠獄以情徃役簡省武邑郡姦人石華告沙門道可與賀謀反有司以聞高宗謂羣臣曰賀誠心事國朕爲卿等保之無此明矣乃精加訊檢華果引誣於是遣使者詔賀曰卿以忠誠款至著自先朝以丹青之潔而受蒼蠅之污朕登時研檢已加極法故遣宣意其善綏所莅勿以囂謗之言致損慮也賀上書謝書奏高宗顧謂左右曰以賀之忠誠

尚致其誣不若是者可無慎乎時考殿最賀治爲第一
賜衣馬噐物班宣天下賀上表請代朝議以賀得民情
不許在州七年乃徵拜太尉蠕蠕寇邊賀從駕追討破
之顯祖將傳位于京兆王子推時賀都督諸軍屯漠南
乃馳傳徵賀賀既至乃命公卿議之賀正色固執不可
卽詔賀持節奉皇帝璽綬以授高祖是歲河西勅勒叛
遣賀率衆討之降二千餘落倍道兼行追賊黨郁朱干
等至枹罕大破之斬首五千餘級虜男女萬餘口雜畜
三萬餘頭復追統萬高平 三鎮叛勅勒至于金城
斬首二千級賀依古今兵法及先儒耆舊之說略採至

要爲十二陳圖以上之顯祖覽而嘉焉賀以年老辭位
詔不許又詔都督三道諸軍屯于漠南是時每歲秋冬
遣軍三道並出以備北寇至春中乃班師賀以勞役京
都又非禦邊長計乃上言請募諸州鎮有武健者三萬
人復其徃賦厚加賑恤分爲三部二鎮之間築城城置
萬人給彊弩十二床武衛三百乘弩一床給牛六頭武
衛一乘給牛二頭多造馬槍及諸噐械使武略大將二
人以鎮撫之冬則講武春則種殖並戍並耕則兵未勞
而有盈畜矣又於白道南三處立倉運近州鎮租粟以
充之足食足兵以備不虞於宜爲便不可歲常舉衆連

動京師令朝廷恒有北顧之慮也事寢不報又上書稱病篤乞骸骨至于再三乃許之朝有大議皆就詢訪又給衣藥珍羞太和元年二月療疾於溫湯高祖文明太后遣使者屢問消息太醫視疾患篤還京師賀乃遣令勅諸子曰吾頃以老患辭事不悟天慈降恩爵逮於汝汝其毋傲吝毋荒怠毋奢越毋嫉妬疑思問言思審行思恭服思度遏惡揚善親賢遠佞目觀必直耳屬必正誠勤以事君清約以行己吾終之後所葬時服單襚足申孝心芻靈明器一無用也三年秋薨年七十三贈侍中太尉隴西王印綬謚曰宣賻雜綵五百匹賜輜輶車及命服溫明祕器陪葬于金陵

長子延性謹厚好學初以功臣子拜侍御中散賜爵武城子西治都將卒贈涼州刺史廣武侯謚曰簡

子鱗襲

延弟思禮後賜名懷謙恭寬雅有大度高宗末爲侍御中散父賀辭老詔懷受父爵拜征南將軍尋爲持節督諸軍屯於漠南還除殿中尚書出爲長安鎮將雍州刺史清儉有惠政善於撫恤劫盜息止流民皆相率來還歲餘復拜殿中尚書加侍中參都曹事又督諸軍征蠕蠕六道大將咸受節度遷尚書令參議律令後例降爲

公除司州刺史從駕南征加衛大將軍領中軍事以母憂去職賜帛三百疋穀千石十九年除征北大將軍夏州刺史轉都督雍岐東秦諸軍事征西大將軍雍州刺史景明二年徵爲尚書左僕射加特進時有詔以奸吏犯罪每多逃遁肆眚乃出並皆釋然自今已後犯罪不問輕重而藏竄者悉遠流若永避不出兄弟代徙懷乃奏曰謹按條制逃吏不在赦限竊惟聖朝之恩事異前宥諸流徙在路尚蒙旋反况有未發而仍遣邊戍按守宰犯罪逃走者衆祿潤旣優尚有茲失及蒙恩宥卒然得還今獨苦此等恐非均一之法如臣管執謂宜免之

書奏門下以成式旣班駁奏不許懷重奏曰臣以爲法貴經通治尚簡要刑憲之設所以網羅罪人苟理之所備不在繁典行之可通豈容峻制此乃古今之達政救世之恒規伏尋條制勲品已下罪發逃亾遇恩不宥仍流妻子雖欲抑絕奸途匪爲通式謹按事條侵官敗法專據流外豈九品已上人皆貞白也其諸州守宰職任清流至有貪濁事發逃竄而遇恩免罪勲品已下獨乖斯例如此則寬縱上流法切下吏育物有差惠罰不等又謀逆滔天輕恩尚免吏犯微罪獨不蒙赦使大宥之經不通開生之路致壅進違古典退乖今律輒率愚見

以爲宜停書奏世宗納之其年除車騎大將軍涼州大
中正懷奏曰南賊游寬江揚職爲亂逆肆厥淫昏月滋
日甚貴臣重將靡有子遺崇信姦回昵比闔豎內外離
心骨肉猜叛蕭寶融僭號於荆郢其雍州刺史蕭衍勒
兵而東襲上流之衆已逼其郊廣陵京口各持兵而懷
兩望鍾離淮陰並鼎峙而觀得失秣陵孤危制不出門
君子小人並罹災禍延首北望朝不及夕斯實天啟之
期吞并之會乘厥蕭牆之釁藉其分崩之際東據歷陽
兼指瓜步緣江鎮戍達於荆郢然後奮雷霆之威布山
河之信則江西之地不刃自來吳會之鄉指期可舉昔

士治有言皓若暴死更立賢主文武之官各得其任則
勅敵也若蕭衍克就上下同心非直後圖之難實亦揚
境危逼何則壽春之去建鄴七百而已山川水陸彼所
諳利脫江湘無波君臣效職藉水憑舟倏忽而至壽春
容不自保江南將若之何今寶卷邑居有土崩之形邊
城無繼援之兆清蕩江區寔在今日臣受恩旣重不敢
不言詔曰不君不臣江南常弊有粟不食其在斯矣上
天將欲亾之諸蕃又願取之人事天道孰云匪會但以
養害人者不爲且十月五日衍軍已達大航其大傷小
亡之勢久應有決假今天罰寶卷衍兵獲進則衍之主

佐又是亂亾遺孽皇靈其能久祐之乎今之所矜者正以南黔企德邊書繼至殄悴之氓理須救接若爾者揚州兵力配積不少但可速遣任城委以處分別加慰勉令妙畫邊筭也以衍事克遂停懷又表曰昔世祖昇遐南安在位出拜東廟爲賊臣宗愛所弑時高宗避難龍潛苑中宗愛異圖神位未定臣亡父先臣賀與長孫渴侯陸麗等表迎高宗纂徽寶命麗以扶負聖躬親所見識蒙授撫軍大將軍司徒公平原王興安二年追論定策之勲進先臣爵西平王皇興季年顯祖將傳大位於京兆王先臣時都督諸將屯於武川被徵詣京特見顧問先臣固執不可顯祖久乃許之遂命先臣持節授皇帝璽綬於高祖至太和十六年麗息獻狀私書稱其亡父與先臣援立高宗朝廷追錄封獻鉅鹿郡開國公臣時丁艱草土不容及例至二十年除臣雍州刺史臨發奉辭而奏先帝申先臣舊勲時勅旨但赴所臨尋當別判至二十一年車駕幸雍臣復陳聞時蒙勅旨征還當授自宮車晏駕遂爾不白竊惟先臣遠則援立高宗寶曆不墜近則陳力顯祖神器有歸如斯之勲超世之事麗以父功而獲河山之賞臣有家勲不霑茅社之賜得否相懸請垂裁處詔曰宿老元臣云如所訴訪之史官

頗亦言此可依比授馮翊郡開國公邑九百戶又詔爲使持節加侍中行臺巡行北邊六鎮恒燕朔三州賑給貧乏兼採風俗考論殿最事之得失皆先決後聞自京師遷洛邊朔遙遠加連年旱儉百姓困敝懷銜命巡撫存恤有方便宜運轉有無通濟時后父于勁勢傾朝野勁兄于祚與懷宿昔通婚時爲沃野鎮將頗有受納懷將入鎮祚郊迎道左懷不與語卽劾祚免官懷朔鎮將元尼須與懷少舊亦會穢狼藉置酒請懷謂懷曰命之長短由卿之口豈可不相寬貸懷曰今日之集乃是源懷與故人飲酒之坐非鞠獄之所也明日公庭始爲使

人檢鎮將罪狀之處尼須揮淚而已無以對之懷旣而表劾尼須其奉公不撓皆此類也懷又表曰景明以來北蕃連年災旱高原陸野不任營殖唯有水田少可菑畝然主將參僚專擅腴美瘠土荒疇給百姓因此困敝日月滋甚諸鎮水田請依地令分給細民先貧後富若分付不平令一人怨訟者鎮將已下連署之官各奪一時之祿四人已上奪祿一周北鎮邊蕃事異諸夏徃日置官全不差別沃野一鎮自將已下八百餘人黎庶怨嗟僉曰煩猥邊隅事欺實少畿服請主帥吏佐五分減二詔曰省表具恤民之懷已勅有司一依所上下爲永

準如斯之比不便於民損化害政者其備列以聞時細民爲豪彊陵壓積年枉滯一朝見申者日有百數所上事宜便於北邊者凡四十餘條皆見嘉納正始元年九月有告蠕蠕率十二萬騎六道並進欲直趨沃野懷朔南寇恒代詔懷以本官加使持節侍中出據北蕃指授規略隨須徵發諸所處分皆以便宜從事又詔懷子直寢微隨懷北行詔賜馬一匹細鎧一具御稍一枚懷拜受訖乃於其庭跨鞍執稍躍馬大呼顧謂賓客曰氣力雖衰尚得如此蠕蠕雖畏壯輕老我亦未便可欺今奉廟勝之規總驍捍之衆足以擒其酋帥獻俘闕下耳時

年六十一懷至雲中蠕蠕亡遁懷旋至恒代案視諸鎮左右要害之地可以築城置戍之處皆量其高下揣其厚薄及儲糧積伏之宜犬牙相救之勢凡表五十八條表曰蠕蠕不羈自古而爾遊蒐鳥集水草爲家中國患者皆斯類耳歷代驅逐莫之能制雖北拓榆中遠臨瀚海而智臣勇將力算俱竭胡人頗遁中國以疲于時賢哲思造化之至理推生民之習業量夫中夏粒食邑居之民蠶衣儒步之士荒表茹毛飲血之類鳥宿禽居之徒親校短長因宜防制知城郭之固暫勞永逸自皇魏統極都於平城威震天下德籠宇宙今定鼎成周去北

遙遠代表諸蕃北固高車外叛尋遭旱儉戎馬甲兵十分闕八去歲復鎮陰山庶事蕩盡遣尚書郎中韓貞宋世量等檢行要險防邊形便謂準舊鎮東西相望今形勢相接築城置戍分兵要害勸農積粟警急之日隨便翦討如此則威形增廣兵勢亦盛且北方沙漠夏之水草時有小泉不濟大衆脫有非意要待秋冬因雲而動若至冬日冰沙凝厲游騎之寇終不敢攻城亦不敢越城南出如此北方無憂矣世宗從之今北鎮諸戍東西九城是也遷驃騎大將軍時武興氏王楊紹先叔集起反叛詔懷使持節侍中都督平氏諸軍事以討之須

興廢任從權其邢巒李煥並稟節度三年六月卒年六十三詔給東園祕器朝服一具衣一襲錢二十萬布七百疋蠟三百斤贈司徒冀州刺史兼吏部尚書盧昶奏太常寺議謚曰懷體尚寬柔器操平正依謚法柔直考終曰靖宜謚靖公司徒府議懷作牧陝西民餘惠化入摠端貳朝列歸仁依謚法布德執義曰穆宜謚穆公二謚不同詔曰府寺所執並不克允愛民好與曰惠可謚惠公懷性寬容簡約不好煩碎恒語人曰爲貴人理世務當舉綱維何必須太子細也譬如爲屋但外望高顯楹棟平正基壁完牢風雨不入足矣斧斤不平斲削

不密非屋之病也又性不飲酒而喜以飲人好接賓友
雅善音律雖在白首至宴居之暇常自操絲竹懷有七
子

長子規字靈度中書學生羽林監襲爵年三十三卒
子肅襲卒

子紹襲景明初詔復王爵尋除隴西郡開國公卒於光
祿大夫贈度支尚書冀州刺史謚曰文

子文遠襲齊受禪例降

規弟榮字靈並年三十二卒於司徒掾贈光州刺史

榮弟徽字靈祚年二十八卒於直閣將軍特贈洛州刺

史謚曰質

徽弟玄諒出後懷弟奐卒贈代郡太守

玄諒弟子雍字靈和少好文雅篤志於學推誠待士士
多歸之自祕書郎除太子舍人涼州中正肅宗踐阼以
宮臣例轉奉車都尉遷司徒屬轉太中大夫司徒司馬
除恒農太守遷夏州刺史時沃野鎮人破落汗拔陵首
爲反亂所在蜂起統萬逆胡與相應接子雍嬰城自守
城中糧盡煮馬皮而食之子雍善綏撫得士心人人戮
力無有離貳以飢饉轉切欲自出求糧留子延伯據守
寮屬僉云今天下分析寇賊萬重四方音信莫不斷絕

俄頃之間變在不意何宜父子如此分張未若棄城俱去更展規略子雍泣而謂衆曰吾世荷國恩早受藩寄此是吾死地更欲何求然守禦以來歲月不淺所患乏糧不得制勝吾今向東州得數月之食還與諸人保全必矣遂自率羸弱向東夏運糧延伯與將士送出城外哭而拜辭二軍莫不嗚咽子雍行數日爲朔方胡帥曹阿各拔所邀力屈見執子雍乃密遣人齎書間行與城中文武云大軍在近努力圍守必令諸人福流苗裔又勅延伯令共固守子雍雖被囚執雅爲胡人所敬常以民禮事之子雍爲陳安危禍福之理勸阿各拔令降阿

各拔將從之未果而死拔弟桑生代總部衆竟隨子雍降時北海王顥爲大行臺子雍具陳賊可滅之狀顥給子雍兵馬令其先行時東夏合境反叛所在屯結子雍轉鬪而前九旬之中凡數十戰仍平東夏徵稅租粟運於統萬於是二夏漸寧及蕭寶寅等爲賊所敗賊帥宿勤明達遣息阿非率衆邀路華州白水被圍逼關右騷擾咫尺不通時子雍新平黑城遂率士馬并夏州募義之民攜家席卷鼓行南出賊帥康維摩擁率羌胡守鋸谷斷斲棠橋子雍與交戰大破之生擒維摩又攻賊帥契官斤於楊氏堡破之子雍出自西夏漸至於東轉戰

千里至是朝廷始得其委問除散騎常侍使持節假撫
軍將軍都督兼行臺尚書復破賊帥紇單步胡提於曲
沃堡肅宗璽書勞勉之子雍在白水郡復破阿非軍多
所斬獲詔遣侍中尚書令城陽王徽於潼關宣旨慰勞
除中軍將軍金紫光祿大夫給事黃門侍郎封樂平縣
開國公邑一千戶還洛以葛榮久逼信都詔假子雍征
北將軍爲北討都督時相州刺史安樂王鑒據鄴反勅
子雍與都督李神軌先討之子雍行達湯陰鑒遣弟斌
之夜襲子雍軍不克奔敗而返子雍乘機繼進徑圍鄴
城與裴衍神軌等攻鑿平之改封陽平縣開國公增邑
千五百戶進號鎮東將軍遂與裴衍發鄴以討葛榮而
信都城陷除子雍冀州刺史餘官如故子雍以冀州不
守上書曰賊中甚飢專仰野掠今朝廷足食兵卒飽暖
高壁深壘勿與爭鋒彼求戰則不得野掠無所獲不盈
數旬可坐制凶醜時裴衍復表求行詔子雍與衍速進
子雍重表固請如謂不可乞令裴衍獨行若不賜解求
停裴衍苟逼固行取敗旦夕詔不聽遂與衍俱進至陽
平郡東北鄆曲榮率賊十萬來逼官軍子雍戰敗被害
年四十朝野痛惜之贈車騎大將軍儀同三司雍州刺
史公如故永安中重贈司空謚曰莊穆

長子延伯出後從伯

次子士則早亾

士則弟士正士規並坐事死

次楷字士質小字郝延襲武定中齊文襄王府參軍齊受禪例降

延伯初爲司空參軍事時南秦民吳富反叛詔以河間王琛爲都督延伯叔父子恭爲軍司延伯爲統軍隨子恭西討戰必先鋒子恭見其年幼常訶制之而不能禁子雍在夏州表乞兵援詔延伯率羽林一千人赴之城關野戰勇冠三軍子雍之向東夏留延伯城守行以後

事延伯與兵士共分湯菜防固城隍及子雍爲胡所執合城憂懼延伯乃人人曉諭曰吾父吉凶不測方寸焦爛實難裁割但奉命守城所爲處重若以私害公誠孝並闕諸君幸得此心無虧所寄於是衆感其義莫不勵憤朝廷聞而嘉之除龍驤將軍行夏州事封五城縣開國子食邑三百戶卒能固守及後刺史至延伯率領義衆還赴子雍共平黑城在甌棠橋戰先鋒陷陳身擒維摩及至白水首摧阿非隨子雍至都進爵浮陽伯增封百戶爲諫議大夫假冠軍將軍別將隨子雍北討與葛榮戰歿時年二十四贈持節平北將軍涼州刺史開國

如故

子孝孫襲齊受禪爵例降

子雍弟子恭字靈順聰慧好學初辟司空參軍事司徒祭酒尚書北主客郎中攝南主客事蕭衍亾人許周自稱爲衍給事黃門侍郎朝士翕然咸共信待子恭奏曰徐州表投化人許團并其弟周等究其牒狀周列云已蕭衍黃門侍郎又稱心存山水不好榮宦屢曾辭讓貽彼赫怒遂被出爲齊康郡因爾歸國願畢志嵩嶺比加採訪略無證明尋其表狀又復莫落案牒推理實有所疑何者昔夷齊獨往周王不屈其志伯況辭祿漢帝因成其美斯實古先詰王必有不臣之人者也蕭衍雖復崎嶇江左竊號一隅至於處物未甚悖禮豈有士辭榮祿而苟不聽之哉推察情理此則孟浪假蕭衍皆狂不存雅道逼士出郡未爲死急何宜輕去生養之士長辭父母之邦乎若言不好榮官志願嵩嶺者初屆之日卽應杖策尋山負帙泔水而乃廣尋知已遍造執事希榮之心已見逃宦之志安在昔梁鴻去鄉終傭吳會逢萌浮海遠客遼東並全志養性逍遙而已考之事實何其懸哉又其履歷清華名位高達計其家累應在不輕今者歸化何其孤迺設使當時忽遽不得攜將及其來後

家貲產業應見簿歛尊卑口累亦當從法而周兄弟怡然嘗無憂感若無種族理或可通如有不坐便應是衍故遣非周投化推究二三真僞難辨請下徐揚二州密訪必令獲實不盈數旬玉石可覩於是詔推訪周果以罪歸闕假稱職位如子恭所疑何州羌却鐵忽反殺害長吏詔子恭持節爲行臺率諸將討之子恭嚴勒州郡及諸軍不得犯民一物輕與賊戰然後示以威恩兩旬間悉皆降款朝廷嘉之正光元年爲行臺左丞巡行北邊轉爲起部郎明堂辟雍並未建就子恭上書曰臣聞辟臺望氣軌物之德旣高方堂布政範世之道斯遠是

以書契之重理冠於造化推尊之美事絕於生民至如郊天饗帝蓋以對越上靈宗祀配天是用酬膺下土大孝莫之能加嚴父以茲爲大乃皇王之休業有國之盛典竊惟皇魏居震統極總宙馭宇革制土中垂式無外自北徂南同上維於洛食定鼎遷民均氣候於寒暑高祖所以始基世宗於是恢構按功成作樂治定制禮乃訪遺文脩廢典建明堂立學校興一代之茂矩標千載之英規永平之中始創雉構基趾草昧迄無成功故尚書令任城王臣澄按故司空臣沖所造明堂樣并連表詔答兩京模式奏求營起緣期發旨卽加葺繕侍中領

軍臣义物動作官宣贊授令自茲厥後方配兵人或給一千或與數百進退節縮曾無定準欲望速理在難克若使專役此功長得營造委成責辦容有就期但所給之夫本自寡少諸處競借動卽千計雖有繕作之名終無就功之實爽塏荒茫淹積年載結架崇構指就無兆仍令肄冑之禮掩抑而不進養老之儀寂寥而不返構厦止於尺土爲山頓於一簣良可惜歟愚謂召民經始必有子來之歌興造勿亟將致不日之美況本兵不多兼之牽役廢此與彼循環無極便是輟創禮之重資不急之費廢經國之功供寺館之役求之遠圖不亦闕

矣今諸寺大作稍以粗舉並可徹減專事經綜嚴勒工匠務令克成使祖宗有薦配之期蒼生覩禮樂之富書奏從之除冠軍將軍中散大夫又領治書侍御史秦益氏反詔子恭持節爲都督河間王琛軍司以討之事平仍行南秦州事及六鎮反以子恭兼給事黃門郎持節慰勞還拜河內太守加後將軍平絳蜀反丹谷清廉二路險澁不通以子恭爲當郡別將俄而建興蜀復反相與連勢進子恭爲持節散騎常侍假平北將軍征建興都督仍兼尚書行臺與正平都督長孫稚合勢進討大破之正平賊帥范明遠與賊帥劉牙奴並面縛請降

事平除平南將軍豫州刺史尋加散騎常侍撫軍將軍
武泰初郢州刺史元願達以城降蕭衍詔徵都督尉慶
賓還京師回衆隸子恭以討之衍將夏侯夔率衆數萬
來寇遠近不安夔乘勢分兵遂逼新蔡自攻毛城子恭
隨方應援賊並破走蕭衍豫州刺史夏侯亶復遣四將
率衆二萬人圍南頓比攻陳項子恭遣軍禦之賊復奔
退加鎮南將軍又兼尚書行臺子恭勒衆渡淮徙民於
淮北立郡縣置戍而還蕭衍直閣將軍軍主胡智達等
八將與其監軍閻次洪入寇屯於州城東北四十餘里
子恭擊破之斬智達生擒次洪元顥之入洛也加子恭

車騎將軍子恭不敢拒之而頻遣間使參莊帝動靜未
幾顥敗車駕還洛進征南將軍兼右僕射假車騎將軍
後加散騎常侍板橋蠻文石活石忌麤受蕭衍印節扇
誘黨類據險寇竊子恭躬率將士徑襲其柵數日之中
殲殪略盡諸蠻款服咸求輸稅徵拜右光祿大夫給事
黃門侍郎仍本將軍錄其前後征討功封臨潁縣開國
侯食邑六百戶加散騎常侍俄遷侍中尔朱榮之死也
世隆度律據斷河橋詔子恭爲都督以討之出頓於大
夏門北尋而太府卿李苗夜燒河橋世隆退走仍以子
恭兼尚書僕射爲大行臺大都督尋遷衛將軍假車騎

將軍率諸將於太行築壘以防之既而尒朱兆率衆南
出子恭所部都督史仵龍羊文義開柵降兆子恭退走
爲兆所破衆旣退散兆因入洛子恭竄于緱氏仍被執
送俄而見釋前廢帝初除驃騎將軍左光祿大夫侍中
如故尋授散騎侍郎都督三州諸軍事本將軍假車騎
大將軍行臺僕射荊州刺史以與定策之勲封臨汝縣
開國子食邑二百戶時叛蠻雷亂清受蕭衍兗州刺史
章綬入爲寇掠諸蠻從之置立郡縣子恭討平之永熙
中入爲吏部尚書加驃騎大將軍以子恭前在豫州戰
功追賞襄城縣開國男食邑二百戶又論子恭餘効封

新城縣開國子食邑四百戶子恭尋表請轉授第五子
文盛許之天平初除中書監三年拜魏尹又爲齊獻武
王軍司元象元年興和二年贈都督徐兗二州諸軍事
驃騎大將軍尚書左僕射司空公兗州刺史謚曰文獻
子彪字文宗子恭存日轉授臨潁縣開國侯武定末太
子洗馬

彪弟文瑤武定中襲襄城縣開國男齊受禪爵並降
子恭弟纂字靈秀負外散騎侍郎累遷征虜將軍通直
散騎常侍涼州大中正轉太府少卿建義初遇害河陰
年三十七贈散騎常侍征北將軍定州刺史

懷弟奐字思周少而謹密初爲中書學生隨父討勅勒有斬獲之功遷中散前後使檢察州鎮十餘所皆有功績除長樂太守以母老解官歸養卒無子
史臣曰源賀堂堂非徒武節而已其翼戴高宗庭抑禪讓殆社稷之臣也懷幹略兼舉出內有聲繼迹賢考不墜先業子雍効立夏方身亡冀野惜乎

列傳第二十九

魏書四十一

列傳第三十

魏書四十二

薛辯

寇讚

酈軌

韓秀

堯暄

薛辯字允白其先自蜀徙於河東之汾陰因家焉祖陶與薛祖薛落等分統部衆故世號三薛父彊復代領部落而祖落子孫微劣彊遂總攝三營善綏撫爲民所歸歷石虎苻堅常憑河自固仕姚興爲鎮東將軍入爲尚書彊卒辯復襲統其營爲興尚書郎建威將軍河北太守辯稍憍傲頗失民心劉裕平姚泓辯舉營降裕司馬德宗拜爲寧朔將軍平陽太守及裕失長安辯來歸國

仍立功於河際太宗授平西將軍雍州刺史賜爵汾陰侯泰常七年卒於位年四十四

子謹字法順容貌魁偉頗覽史傳劉裕擒泓辟相府行參軍隨裕渡江尋轉記室參軍辯將歸國密使報謹遂自彭城來奔朝廷嘉之授河東太守後襲爵平西將軍汾陰侯謹所治與屈丐連接結士抗敵甚有威惠始光中世宗詔奚斤討赫連昌勅謹領偏師前鋒鄉導旣尅蒲坂世祖以新舊之民并爲一郡謹仍爲太守遷秦州刺史將軍如故山胡白龍憑險作逆世祖詔鎮南將軍奚眷與謹自太平北入討平之除安西將軍涪陵公刺

史如故太延初征吐沒骨平之謹自郡遷州威惠兼備風化大行時兵荒之後儒雅道息謹命立庠教以詩書三農之暇悉令受業躬巡邑里親加考試於是河汾之地儒道興焉真君元年徵還京師除內都坐大官五年爲都將從駕北討以後期與中山王辰等斬於都南時年四十四尋贈鎮西將軍秦雍二州刺史謚曰元公長子初古拔一曰車轂拔本名洪祚世祖賜名沉毅有器識年始弱冠司徒崔浩見而奇之真君中蓋吳擾動關右薛永宗屯據河側世祖親討之乃詔拔糾合宗鄉壁於河際斷二寇往來之路事平除中散賜爵永康侯

世祖南討以拔爲都將從駕臨江而還又共陸真討反
氏仇偃檀彊免生平之皇興三年除散騎常侍尚西河
長公主拜駙馬都尉其年拔族叔劉或徐州刺史安都
據城歸順勅拔詣彭城勞迎除冠軍將軍南豫州刺史
延興二年除鎮西大將軍開府進爵平陽公三年拔與
南兖州刺史游明根南平太守許舍等以治民著稱徵
詣京師顯祖親自勞勉復令還州太和六年改爵爲河
東公八年三月詔拔入朝暴病卒年五十八贈左光祿
大夫謚曰康

長子胤字寧宗少有父風弱冠拜中散襲爵鎮西大將

軍河東公除懸瓠鎮將蕭贖遣將寇邊詔胤爲都將與
穆亮等拒於淮上尋授持節義陽道都將十四年文明
太后公除高祖詔諸刺史鎮將曾經近侍者皆聽赴闕
胤隨例入朝屬開革五等降公爲侯十七年高祖南討
詔趙郡王幹司空穆亮爲西道都將時幹年少未涉軍
旅高祖乃除胤假節假平南將軍爲幹副軍行達哀父
以蕭贖死班師又爲都將共討秦州反賊支酉疑生擒
斬之除立忠將軍河北太守郡帶山河路多盜賊有韓
馬兩姓各二千餘家恃彊憑險最爲狡害劫掠道路侵
暴鄉閭胤至郡之日卽收其奸魁二十餘人一時戮之

於是羣盜懾氣郡中清肅二十三年秋遇疾卒於郡時年四十四謚曰敬

子裔字豫孫襲爵性豪爽盛營園宅賓客聲伎以恣嬉遊歷尚書左外兵郎左軍將軍遷征虜將軍中散大夫出為洛州刺史卒贈平西將軍岐州刺史

子孝紳襲爵稍遷前將軍太中大夫孝紳立行險薄坐事為河南尹元世雋所劾死後贈征西將軍華州刺史

胤弟 字崇業廣平王懷關中令汝陰太守

子修仁司空行參軍

修仁弟玄景陳留太守

拔弟洪隆字菩提解褐陽平王國常侍稍遷河東太守長子麟駒好讀書舉秀才除中書博士太和九年蕭贖使至乃詔麟駒兼主客郎以接之十年秋遇疾卒時年三十五贈寧朔將軍河東太守謚曰宣

長子慶之字慶集頗以學業聞解褐奉朝請領侍御史遷廷尉丞廷尉寺鄰接北城曾夏日於寺傍執得一狐慶之與廷尉正博陵崔纂或以城狐狡害宜速殺之或以長育之月宜待秋分二卿裴延雋袁翻互有同異雖曰戲謔詞義可觀事傳於世轉尚書郎兼尚書左丞為并肆行臺賜爵龍丘子行并州事遷征虜將軍滄州刺

史爲葛榮攻圍城陷尋患卒後贈右將軍華州刺史
慶之弟英集性通率隨舅李崇在揚州積年以軍功歷
司徒鎧曹參軍稍遷治書侍御史通直散騎常侍卒
麟駒弟鳳子自徙都洛邑鳳子兄弟移屬華州河西郡
焉太和二年爲太子詹事丞本州中正世宗登阼轉太
尉府鎧曹參軍稍遷治書侍御史正始初爲持節征義
陽軍司還京其年秋卒時年四十九贈陵江將軍光城
太守

鳳子弟驥奴州主簿

洪隆弟破胡州治中別駕稍遷河東太守征仇池都將
有六子

長子聰字延智有世譽累遷治書侍御史直閣將軍爲
高祖所知世宗踐阼除輔國將軍齊州刺史卒於州贈
征虜將軍華州刺史

長子景茂司州記室從事猗氏令早卒

景茂弟孝通頗有文學永安中中尉高道穆引爲御史
歷中書舍人中書侍郎常山太守遇惡疾而卒
聰弟道智尚書郎卒

子長瑜天平中爲征東將軍洛州刺史擊賊潼關沒於
陳贈都督冀定泰三州諸軍事車騎將軍冀州刺史

道智弟仙智郡功曹

仙智弟曇賢卒於國子博士

小子景淵尚書左氏郎

曇賢弟和字導穆解褐大將軍劉昶府行參軍轉司空長流參軍除太尉府主簿遷諫議大夫永平四年正月山賊劉龍駒擾亂夏州詔和發汾華東秦夏四州之衆討龍駒平之和因表立東夏州世宗從之又行正平潁川二郡事除通直散騎常侍蕭衍遣將張齊寇晉壽詔和兼尚書左丞爲西道行臺節度都督傅豎眼諸軍大破齊軍正光初除左將軍南青州刺史卒於州年五十

五贈安北將軍瀛州刺史

長子元信武定末中軍將軍儀同開府長史

和弟季令奉朝請

破胡弟破氏爲本州別駕早卒四子

長子敬賢爲鉅鹿太守

破氏弟積善爲中書博士臨淮王提友

子隆宗太原太守

寇讚字奉國上谷人因難徙馮翊萬年父脩之字延期苻堅東萊太守讚弟謙之有道術世祖敬重之故追贈修之安西將軍秦州刺史馮翊公賜命服謚曰哀公詔

秦雍二州爲立碑於墓又贈脩之母爲馮翊夫人及宗從追贈太守縣令侯子男者十六人其臨民者七郡五縣讚少以清素知名身長八尺姿容儼疑非禮不動符堅僕射韋華州里高達雖年時有異恒以風味相待華爲馮翊太守召爲功曹後除襄邑令姚泓滅秦雍人千有餘家推讚爲主歸順拜綏遠將軍魏郡太守其後秦雍之民來奔河南滎陽河內者戶至萬數拜讚安遠將軍南雍州刺史軹縣侯治于洛陽立雍州之郡縣以撫之由是流民^強負自遠而至參倍於前賜讚爵河南公加安南將軍領護南蠻校尉仍刺史分洛豫二州之僑

郡以益之雖位高爵重而接待不倦初讚之未貴也嘗從相者唐文相文曰君額上黑子入幘位當至方伯封公及貴也文以民禮拜謁仍曰明公憶民疇昔之言乎爾曰但知公當貴然不能自知得爲州民也讚曰往時卿言杜瓊不得官長人咸謂不然及瓊被選爲蓋屋令卿猶言相中不見而瓊果以暴疾未拜而終昔魏舒見主人兒死自知已必至公吾常以卿言瓊之驗亦復不息此望也乃賜文衣服良馬讚在州十七年甚獲公私之譽年老表求致仕真君九年卒年八十六遺令薄葬歛以時服世祖悼惜之謚曰宣穆

長子元寶襲爵爲豫州別駕興安元年卒贈安南將軍
豫州刺史

子祖襲爵高祖時爲安南將軍東徐州刺史卒

子靈孫襲赭陽太守

元寶弟虎皮有才器本縣令

虎皮弟臻字仙勝年十二遭父憂居喪以孝稱輕財好
士顯祖末爲中川太守時馮熙爲洛州刺史政號貪虐
仙勝微能附之甚得其意轉弘農太守後以母老屢求
解任久乃從之高祖初母憂未闋以恒農大盜張煩等
賊害良善徵爲都將與荊州刺史公孫初頭等追捕之

拜振武將軍北陽鎮將有威惠之稱遷建威將軍郢州
刺史及高祖南遷郢州地爲王畿除弘農太守坐受納
爲御史所彈遂廢卒於家

長子祖訓順陽太守

祖訓弟治字祖禮自洛陽令稍遷鎮遠將軍東荊州刺
史代下之後蠻民以刺史酈道元峻刻請治爲刺史朝
議以邊民宜悅乃以治代道元進號征虜將軍坐遣戍
兵送道元免官治兄弟並孝友敦穆白首同居父亾雖
久而猶於平生所處堂宇備設幃帳几杖以時節開堂
列拜垂淚陳薦若宗廟然吉凶之事必先啟告遠出行

反亦如之治世宗末遷前將軍河州刺史在任數年遇
郤鐵忽反又爲城民詣都列其貪狀十六條會赦免久
之兼廷尉卿又兼尚書畏避勢家承顏候色不能有所
執據尋遷金紫光祿大夫是時蠻反於三鴟治爲都督
追討戰沒贈持節都督雍華岐三州諸軍事衛大將軍
七兵尚書雍州刺史昌平男

治弟彌兼尚書郎爲城陽王徽所親待永安末徽避尔
朱兆脫身南走歸命於彌彌不納遣人加害時論深責
之後沒關西

治長子肫之字長明自直後奉朝請再遷鎮遠將軍諫
議大夫仍直後建義中出除冠軍將軍東荊州刺史兼
尚書爲荊郢行臺代遷除征虜將軍普泰中襲爵又爲
東荊州刺史永熙中鎮東將軍金紫光祿大夫武定四
年卒年五十八

酈範字世則小名記祖范陽涿鹿人祖紹慕容寶濮陽
太守太祖定中山以郡迎降授兗州監軍父嵩天水太
守範世祖時給事東宮高宗踐阼追錄先朝舊勳賜爵
永寧男加寧遠將軍以治禮郎奉遷世祖恭宗神主於
太廟進爵爲子征南大將軍慕容白曜南征範爲左司
馬師次無鹽劉彧戍主申纂憑城拒守識者僉以攻具

未周不宜便進。範曰：今輕軍遠襲，深入敵境，無宜淹留。又稽機候，且纂必以我軍來，速不去攻，守謂方城可憑。弱卒可恃，此天亾之時也。今若外潛威形，內整戎旅，密厲將士，出其非意，可一攻而尅之。白曜曰：一日縱敵，數世之患。今若舒遲，民心固矣。司馬之策是也。遂潛軍，偽退，示以不攻。纂果不設備。於是卽夜部分，旦便騰城，崇朝而尅。白曜將盡以其人爲軍。實範曰：齊四履之地，世號東秦，不遠爲經略，恐未可定也。今皇威始被，民未霑澤，連城有懷貳之將，比邑有拒守之夫，宜先信義示之。軌物然後，民心可懷。二州可定。白曜曰：此良策也。乃免之。進次肥城。白曜將攻之。範曰：肥城雖小，攻則淹日，得之無益，軍聲失之有損。威勢且見，無鹽之卒死者塗炭。成敗之機足爲鑒矣。若飛書告喻，可不攻自伏。縱其不降，亦當逃散。白曜乃以書曉之。肥城果潰。白曜目範於衆曰：此行也得卿三齊不足定矣。軍達升城，劉彧、太原太守房崇吉、棄母妻東走。彧、青州刺史沈文秀遣其寧朔將軍張元孫奉牋歸款，請軍接援。白曜將遣偏師赴之。範曰：桑梓之戀，有懷同德。文秀家在江南，青土無墳，桓之累擁，衆數萬，勁甲堅城，彊則拒戰，勢屈則走。師未逼之，朝夕無患，竟何所畏。已求援軍，且觀其使詞，煩而

顏愧視下而志怯幣厚言甘誘我也若不遠圖懼虧軍勢既進無所取退逼疆敵羝羊觸藩羸角之謂未若先守歷城平盤陽下梁鄒尅樂陵然後方軌連鑣揚旌直進何患不壺漿路左以迎明公者哉白曜曰卿前後納策皆不失衷今日之筭吾所不取何者道固孤城裁能自守盤陽諸戍勢不野戰文秀必尅殄意在先誠天與不取後悔何及範曰短見猶謂不虛歷城足食足兵非一朝可拔文秀既據東陽爲諸城根本多遣軍則歷城之固不立少遣衆則無以懼敵心脫文秀還叛閉門拒守偏師在前爲其所挫梁鄒諸城追擊其後文秀身率

大軍必相乘迫腹背受敵進退無途雖有韓白恐無全理願更思審勿入賊計中白曜乃止遂表範爲青州刺史以撫新民後進爵爲侯加冠軍將軍遷尚書右丞後除平東將軍青州刺史假范陽公範前解州還京也夜夢陰毛拂踝他日說之時齊人有占夢者曰史武進云豪盛於齊下矣使君臨撫東秦道光海岱必當重牧全齊再祿營丘矣範笑而答曰吾將爲卿必驗此夢果如其言是時鎮將元伊利表範與外賊交通高祖詔範曰卿身非功舊位無重班所以超遷顯爵任居方夏者正以勤能致遠雖外無殊效亦未有負時之愆而鎮將伊

利妄生姦撓表卿造船市玉與外賊交通規陷卿罪窺
覬州任有司推驗虛實自顯有罪者今伏其辜矣卿其
明爲筭略勿復懷疑待卿別犯處刑及鞭今恕刑罷鞭
止罰五十卿宜克循綏輯邊服稱朕意也還朝年六十
二卒於京師謚曰穆範五子道元在酷吏傳

道元第四弟道慎字善季涉歷史傳有幹略自奉朝請
遷尚書二千石郎中加威遠將軍爲漢川行臺迎接降
款以功除員外常侍領郎中轉輔國將軍驍騎將軍出
爲正平太守治有能名遷長樂相正光五年卒年三十
八贈後將軍平州刺史

于中字伯偉武定初司徒刑獄參軍

道慎弟道約字善禮起家奉朝請再遷冠軍將軍司徒
諮議參軍樸質遲鈍頗愛琴書性多造請好以榮利于
謁乞丐不已多爲人所笑弄坎塲於世不免飢寒晚歷
東萊魯郡二郡太守爲政清靜吏民安之年六十三武
定七年卒

範弟神虎尚書左民郎中

神虎弟夔子暉字幼和好學有文才尤長吏幹正光中
刺史裴延儁用爲主簿令其修起學校又舉秀才射策
高第爲奉朝請後延儁爲討胡行臺尚書引爲行臺郎

以招撫有稱除尚書外兵郎仍行臺郎及延雋解還行臺長孫雅又引爲行臺郎加征虜將軍惲頗兼武用常以功名自許每進計於雅多見納用以功賞魏昌縣開國子邑三百戶惲在軍啟求減身官爵爲父請贈詔贈夔征虜將軍安州刺史惲後與唐州刺史崔元珍固守平陽武泰中尒朱榮稱兵赴洛惲與元珍不從其命爲榮行臺郎中樊子鵠所攻城陷被害時年三十六世咸痛惜之所作文章頗行於世撰慕容氏書不成子懷則武定末司空長流參軍

夔弟神期中書博士

神期弟顯度司州秀才尚書庫部郎

韓秀字白虎昌黎人也祖宰慕容雋謁者僕射父昞皇始初歸國拜宣威將軍騎都尉秀歷吏任稍遷尚書郎賜爵遂昌子拜廣武將軍高宗稱秀聰敏清辯才任喉舌遂命出納王言并掌機密行幸遊獵隨侍左右顯祖踐阼轉給事中參征南慕容白曜軍事延興中尚書奏以敦煌一鎮介遠西北寇賊路衝慮或不固欲移就涼州羣官會議僉以爲然秀獨謂非便曰此感國之事非關土之宜愚謂敦煌之立其來已久雖土隣疆寇而兵人素習縱有姦竊不能爲害循管置戍足以自全進斷

比狄之覘途退塞西夷之闕路若徙就姑臧慮人懷異
意或貪留重遷情不願徙脫引寇內侵深爲國患且敦
煌去涼州及千餘里捨遠就近遙防有闕一旦廢罷是
啟戎心則夷狄交構互相來往恐醜徒協契侵竊涼土
及近諸戍則關右荒擾烽警不息邊役煩興艱難方甚
乃從秀議太和初遷內侍長後爲平東將軍青州刺史
假漁陽公在州數年卒

子務襲爵

務字道世性端謹有治幹初爲中散稍遷太子翊軍校
尉時高祖南征行梁州刺史楊靈珍謀叛以務爲統軍

受都督李崇節度以討靈珍有戰功授後軍長史徵赴
行在所還遷長水校尉景明初假節行肆州事轉左中
郎將寧朔將軍試守常山郡又爲征蠻都督李崇司馬
崇揃蕩羣蠻除近畿之患務有力焉後除鎮北府司馬
初試守常山府解復爲平北長史務頗有受納爲御史
中尉李平所劾付廷尉會赦免後除龍驤將軍郢州刺
史務獻七寶牀象牙席詔曰晉武帝焚雉頭裘朕常嘉
之今務所獻亦此之流也奇麗之物有乖風素可付其
家人邊人李旻馬道進等詐殺蕭衍黃坂戍主率戶來
降務信之遣兵千餘人迎接戶旣不至而詐表破賊坐

以免官久之拜冠軍將軍太中大夫進號左將軍神龜
初卒

堯暄字辟邪上黨長子人也本名鍾葵後賜爲暄祖僧
賴太祖平中山與趙郡呂舍首來歸國暄聰了美容貌
爲千人軍將東宮吏高宗以其恭謹擢爲中散奉使齊
州檢平原鎮將及長史貪暴事推情診理皆得其實除
太尉中給事兼北部曹事後轉南部太和中遷南部尚
書于時始立三長暄爲東道十三州使更比戶籍賜獨
車一乘廐馬四匹時蕭贖遣其將陳顯達寇邊

以暄爲使持節假中護軍都督南征諸軍事平陽公軍
次許昌會陳顯達遁走暄乃班師暄前後從征及出使
檢察三十餘許度皆有克已奉公之稱賞賜衣服二十
具綵絹十匹紬絹千餘段奴婢十口賜爵平陽伯及改
置百官授太僕卿車駕南征加安南將軍轉大司農卿
太和十九年卒於平城高祖爲之舉哀贈安北將軍相
州刺史賻帛七百匹初暄使徐州見州城樓觀嫌其華
盛乃令徃徃毀撤由是後更損落及高祖幸彭城聞之
曰暄猶可追斬

暄長子洪襲爵鎮北府錄事參軍

子桀字永壽元象中開府儀同三司樂城縣開國公

洪弟遵伏波將軍河州冠軍府長史臨洮太守卒贈龍驤將軍謚曰思

遵弟榮貞外散騎侍郎

子榮字休武元象中儀同三司豫州刺史城平縣開國公

雄弟奮字彥舉興和中驃騎將軍潁州刺史

奮弟難宗武定中征西將軍南岐州刺史征羌縣開國伯

呂舍既歸國從至京師給賜田宅

子方生機識明辯卒於主書郎贈建武將軍定州刺史

高邑子謚曰敬

子受恩爲侍御中散典宜官曹累遷外都曹令轉北部給事秦州刺史卒於官

史臣曰薛辯寇讚歸身有道並以款効見嘉議敦煌得馭遠之筭務武夫鄙詐貢牀飾寶棄而不御斯乃人主之盛德堯暄聰察奉公以致名位禮加存歿有餘榮矣

列傳第三十一

魏書四十二

列傳第三十一

魏書四十三

嚴稜

毛脩之

唐和

劉休賓

房法壽

嚴稜馮翊臨晉人遇亂避地河南劉裕以為廣威將軍
 陳留太守戍倉垣泰常中山陽公奚斤南討軍至潁川
 稜率文武五百人詣斤降驛送稜朝太宗於冀州嘉其
 誠款拜平遠將軍賜爵郟陽侯假荊州刺史隨駕南討
 還為上客及世祖踐祚以稜歸化之功除中山太守有
 清廉之稱年九十卒於家

子稚玉襲爵真君中詔稚玉副長安鎮將元蘭率眾一

高平

魏書四十二

列傳第三十一

魏書四十三

嚴稜

毛脩之

唐和

劉休賓

房法壽

嚴稜馮翊臨晉人遇亂避地河南劉裕以為廣威將軍陳留太守戍倉垣泰常中山陽公奚斤南討軍至潁川稜率文武五百人詣斤降驛送稜朝太宗於冀州嘉其誠款拜平遠將軍賜爵郟陽侯假荊州刺史隨駕南討還為上客及世祖踐祚以稜歸化之功除中山太守有清廉之稱年九十卒於家

子稚玉襲爵真君中詔稚玉副長安鎮將元蘭率眾一

萬迎漢川附化之民入自斜谷至甘亭劉義隆梁州刺史王玄載遣將拒嶮路不得通班師太和二年太倉令五年出爲平南將軍東兗州刺史假馮翊公卒

子曇襲爵

毛修之字敬文滎陽武人也父瑾司馬德宗梁秦二州刺史劉裕之擒姚泓留子義真鎮長安以脩之爲司馬及赫連屈丐破義真於青泥修之被俘遂沒統萬世祖平赫連昌獲修之神麈中以修之領吳兵討蠕蠕大檀以功拜吳兵將軍領步兵校尉後從世祖征平涼有功遷散騎常侍前將軍光祿大夫修之能爲南人飲食

手自煎調多所適意世祖親待之進太官尚書賜爵南郡公加冠軍將軍常在太官主進御膳從討和龍別破三堡賜奴婢牛羊是時諸軍攻城宿衛之士多在戰陳行宮人少雲中鎮將朱修之劉義隆故將也時從在軍欲率吳兵謀爲大逆因入和龍與浮海南歸以告修之修之不聽乃止是日無修之大變幾作朱修之遂亾奔馮文通又以修之收三堡功多遷特進撫軍大將軍金紫光祿大夫位次崔浩之下浩以其中國舊門雖學不博洽而猶涉獵書傳每推重之與共論說言次遂及陳壽三國志有古良史之風其所著述文義典正皆揚于

王廷之言微而顯婉而成章班史以來無及壽者修之
曰昔在蜀中聞長老言壽曾爲諸葛亮門下書佐被捷
百下故其論武侯云應變將略非其所長浩乃與論曰
承祚之評亮乃有故義過美之譽案其迹也不爲負之
非挾恨之矣何以云然夫亮之相劉備當九州鼎沸之
會英雄奮發之時君臣相得魚水爲喻而不能與曹氏
爭天下委棄荊州退入巴蜀誘奪劉璋僞連孫氏守窮
崎嶇之地僭號邊夷之間此策之下者可與趙他爲偶
而以爲管蕭之亞匹不亦過乎謂壽貶亮非爲失實且
亮旣據蜀恃山嶮之固不達時宜弗量勢力嚴威切法
控勒蜀人矜才負能高自矯舉欲以邊夷之衆抗衡上
國出兵隴右再攻祁山一攻陳倉踈遲失會摧衄而反
後入秦川不復攻城更求野戰魏人知其意閉壘堅守
以不戰屈之知窮勢盡憤結攻中發病而死由是言之
豈合古之善將見可而進知難而退者乎修之謂浩言
爲然太延二年爲大都大官卒謚曰恭公修之在南有
四子唯子法仁入國高宗初爲金部尚書襲爵後轉殿
中尚書加散騎常侍法仁言聲壯大至於軍旅田狩唱
呼處分振於山谷和平六年卒贈征東大將軍南郡王
謚曰威

長子猛虎太安中爲東宮主書轉中舍人又遷中散大夫初襲爵爲散騎常侍皇興中蠕蠕犯塞從顯祖討之有勇決之稱太和初卒贈豫州刺史謚曰康公

子秦寶襲爵征虜長史例降爲侯卒

子乾祐襲

朱脩之者劉義隆司徒從事中郎守滑臺婁頡圍之其母在家乳汁忽出母號慟告家人曰我年老非復有乳汁之時今忽如此兒必歿矣果以其日爲頡所擒世祖善其固守授以內職以宗室女妻之而佞巧輕薄爲人士所賤爲雲中鎮將及入馮文通文通送之江南

唐和字稚起晉昌宜安人也父繇以涼土喪亂民無所歸推隴西李暲於敦煌以寧一州李氏爲沮渠蒙遜所滅和與兄契攜外甥李寶避難伊吾招集民衆二千餘家臣於蠕蠕蠕蠕以契爲伊吾王經二十年和與契遣使來降爲蠕蠕所逼遂擁部落至高昌蠕蠕遣部帥阿若率騎討和至白力城和率騎五百先攻高昌契與阿若戰歿和收餘衆奔前部王國時沮渠安周屯橫截城和攻拔之斬安周兄子樹又尅高寧白力二城斬其戍主遣使表狀世祖嘉其誠款屢賜和和後與前部王車伊洛擊破安周斬首三百世祖遣成周公萬度歸

馬耆詔和與伊洛率所領赴度歸和奉詔會度歸喻下
柳驢以東六城因共擊波居羅城拔之後同征龜茲度
歸令和鎮焉耆時柳驢戍主乙真伽率諸胡將據城而
叛和領輕騎一百匹入其城擒乙真伽斬之由是諸胡
款附西域尅平和有方也正平元年和詣闕世祖優寵
之待以上客高宗以和歸誠先朝拜鎮南將軍酒泉公
大安中出爲濟州刺史其有稱績徵爲內都大官評決
獄訟不加捶楚察疑獲實者甚多世以是稱之皇興中
卒年六十七贈征西大將軍太常卿酒泉王謚曰宣
子欽字孟直中書學生襲爵太和中拜鎮南將軍長安

鎮副將轉陝州刺史將軍如故後降爵爲侯二十年卒
子景宣襲爵歷并州城陽王徽後軍府長史加中堅將
軍遷東郡太守普泰中卒贈撫軍將軍秦州刺史

景宣弟季弼武定中滄洲別駕

契子玄達性果毅有父風與叔父和歸闕俱爲上客拜
安西將軍晉昌公顯祖時出爲華州刺史將軍如故杏
城民蓋平定聚衆爲逆顯祖遣給事楊鍾葵擊平定不
尅而還詔玄達討平之杏城民成赤李又聚黨自號爲
王逼掠郡縣殘害百姓玄達率騎二百邀其狹路擊破
之叛民曹平原復聚爲亂玄達追擊悉平之延興二年

有罪免官太和十六年降爵爲侯卒

子崇字繼祖襲爵盛樂太守

崇弟興業定陽闡熙二郡太守

劉休賓字處幹本平原人祖昶從慕容德度河家于北海之都昌縣父奉伯劉裕時北海太守休賓少好學有文才兄弟六人乘民延和等皆有時譽休賓爲劉彧虎賁中郎將稍遷幽州刺史鎮梁鄒及慕容白曜軍至升城遣人說之令降休賓不從劉彧龍驤將軍崔靈延行渤海郡房靈建等數十家皆入梁鄒同舉休賓爲征虜兗州會劉彧遣使授休賓輔國將軍兗州刺史休賓妻

崔邪利女也生一男字文曄崔氏先歸寧在魯郡邪利之降也文曄母子遂與俱入國至是白曜表請崔與文曄旣至白曜以報休賓又於北海執延和妻子送至梁鄒巡視城下休賓答白曜許歷城降當卽歸順密遣兼主簿尹文達向歷城觀國軍形勢文達詣白曜詐言聞王臨境故來祇候私謂白曜曰劉休賓父子兄弟累郡連州今若識運知機束手歸化不審明王加何賞叙白曜曰休賓仕南爵寵如此今若不勞兵甲望風自降者非直處卿富貴兼還其婦兒休賓縱令不畏攻圍豈不憐其妻子也今升城卿自往見文達乃至升城見休賓

妻子文曄攀援文達哭泣號咷以爪髮爲信文達回還復經白曜誓約而去白曜曰卿是休賓耳目腹心親見其妻子又知我衆旅少多善共量議自求多福文達還見休賓出其妻兒爪髮兼宣白曜所言及國軍形勢謂休賓曰升城已敗歷城非朝則夕公公可早圖之休賓撫爪髮泣涕曰妻子幽隔誰不愍乎吾荷南朝厚恩受寄邊任今顧妻子而降於臣節足乎然而密與其兄子聞慰議爲降計聞慰曰此故當文達誑詐耳年常抄掠豈有多軍也但可撫彊兵勤肅衛方城狹嶮何爲便生憂怯示人以弱也休賓又謂文達曰卿勿憚危苦更爲吾

作一返善觀形勢於是遣文達偷道而出令與白曜爲期尅日許送降款文達既至白曜喜曰非直休賓父子荷築城內賢豪亦隨人補授卿便卽爲梁鄒城主以酒灌地啓告山河曰若負休賓使我三軍覆沒初白曜之表取休賓妻子也顯祖以道固旣叛詔授休賓持節平南將軍冀州刺史平原公至是付文達詔策文達還謂休賓曰白曜信誓如此公公可早爲決計恐攻逼之後降悔無由休賓於是告兄子聞慰曰事勢可知汝早作降書聞慰沈疑因執不作遂差本契白曜尋遣著作佐郎許赤虎夜至梁鄒南門下告城上人曰汝語劉休賓何

由遣文達頻造僕射許送降文歸誠大化何得無信違
期不來於是門人唱告城內悉知遂相維持欲降不得
皆云劉休賓父子欲以我城內人易榮位也尋被攻逼
經冬至春歷城降白曜遣道固子景業與文曄至城下
休賓知道固降乃出請命白曜送休賓及宿有名望者
十餘人俱入代都爲客及立平齊郡乃以梁鄒民爲懷
寧縣休賓爲縣令延興二年卒

文曄有志尚綜覽羣書輕財重義太和中坐從兄聞慰
南叛與二弟文顥季友被徙北邊高祖特聽還代高祖
曾幸方山文曄大言於路側曰求見聖明申宣久屈高

祖遣尚書李冲宣詔問曰卿欲何言聽卿面自申盡於
是引見文曄對曰臣之陋族出自平原往因燕亂流離
河表居齊以來八九十載真君十一年世祖太武皇帝
巡江之日時年二歲隨外祖魯郡太守崔邪利於鄒山
歸國邪利蒙賜四品除廣寧太守以臣年小不及齒錄
至天安之初皇威遠被臣亾父休賓劉氏持節兗州刺
史戍梁鄒時慕容白曜以臣父居全齊之要水陸道衝
青冀二城往來要路三城岳峙並拒王師白曜知臣母
子先在代京表請臣母子慰勞臣卽被先帝詔遣乘傳
詣軍又賜亾父官爵白曜遣右司馬盧河內等送臣母

子至鄒臣既見亾父備申皇澤云吾蒙本朝寵遇捍禦藩屏尊卑百口並在二城吾若先降百口必被誅滅既不固誠於本朝又令尊卑塗炭豈堪爲人臣以奉大魏乎汝且申吾意曰僕射降意已判平歷城卽率士衆送款軍前旣尅歷城白曜遣赤虎送臣并崔道固子景業等向梁鄒亾父旣見赤虎之信仰感聖朝遠遣妻子又知天命有歸擁衆一萬以城降款乘驛赴臺蒙爲客例臣私釁深重亾父以延興二年孤背明世血誠微心未獲申展如臣等比並蒙榮爵爲在事孤抑以人廢勲高祖曰卿訴又賞而卿父無勲歷城齊之西關歸命請順

梁鄒小戍豈能獲全何足以爲功也文曄對曰誠如聖旨愚臣所見猶有未申何者昔樂毅破齊七十餘城唯有一卽墨獨在此豈非根亡而條立且夫降順之人驗之古今未有不由危逼者故黃權無路歸款列地封侯且薛安都畢衆敬危急投命並受茅土之爵論古則如彼語今則如此明明之世不及比流竊惟梁鄒巖固地據中齊粟支十載控弦數十萬方之升城不可同日而語升城猶能抗兵累旬傷殺甚衆若臣亾父固守孤城則非一朝可尅高祖曰歷城旣陷梁鄒便是掌中何煩兵力對曰若如聖旨白曜便應窮兵極意取勝俯仰何爲

上假赤虎之信下銜知變之民高祖曰卿父此勲本自
至少以卿才地豈假殷勤對曰臣疋愚六蔽文武無施
響絕九臯聞天無日遭逢聖運萬死猶生但臣竊見徐
充是賊藩要徐充既降諸戍皆應國有而東徐州刺史
張讜所戍圍城領二郡而已徐充降後猶閉門拒命授
以方嶽始乃歸降父子二人並蒙侯爵論功比勤不先
臣父高祖曰卿引張讜讜事小異對曰臣未識異狀高
祖曰張讜始來送款終不差信卿父進非先覺退又拒
守何得不異對曰張讜父子始有歸順之名後有閉門
之罪以功補過免罪爲幸臣又見崔僧祐母弟隨其叔

父道固在歷城僧祐遙聞王威遠及恐母弟淪亾督率
鄉閭來欲救援既至郁洲歷城已沒束手歸誠救母弟
之命聖朝嘉其附化賞以三品亾父之誠豈後僧祐高
祖曰僧祐身居東海去留任意來則有位去則他人是
故賞之卿父被圍孤城已是亾物所以不賞對曰亾父
據城歸國至公也僧祐意計而來爲私也爲私蒙賞至
公不酬臣未見其可高祖笑而不言比部尚書陸獻叱
文曄曰假令先朝謬賞僧祐豈可謬相賞也文曄曰先
帝中代聖主與日月等曜比隆堯舜宰相則十亂五臣
今言謬賞豈不仰誣先朝乎尚書高閭曰卿謂母弟與

妻子何者爲重文曄曰母弟爲重閻曰卿知母弟爲重
朝廷賞僧祐是也卿父爲妻子而來事何相反對曰僧
祐若無母弟來歸以不閻曰不來文曄曰若僧祐赴母
弟之難此是其私而亡父本爲大丈夫立身處世豈可
顧妻子而虧高節也昔樂羊食子有顧以不亾父本心
實不垂顧所以歸化者自知商周不敵天命有所歸高
祖謂文曄曰卿之所許頗亦有途賞從重罰從輕尋勅
酬叙文曄泣曰臣愚頓理極再見無期陛下旣垂慈澤
願勅有司特賜矜理高祖曰王者無戲何待勤勤旣而
賜文曄爵都昌子深見待遇拜協律郎中改授羽林監

世宗世除高陽太守延昌中卒贈平遠將軍光州刺史
謚曰貞

子元襲拜員外郎襄威將軍青州別駕卒

文顯性仁孝篤厚徐州安豐王府騎兵參軍季友南青
州左軍府錄事參軍

聞慰博識有才思至延興中南叛

休賓叔父旋之其妻許氏二子法鳳法武而旋之早亾
東陽平許氏攜二子入國孤貧不自立並踈薄不倫爲
時人所棄母子皆出家爲尼旣而反俗太和中高祖選
盡物望河南人士才學之徒咸見申擢法鳳兄弟無可

收用不蒙選授後俱奔南法武後改名孝標云
房法壽小名烏頭清河繹幕人也幼孤少好射獵輕率
勇果結羣小而爲劫盜從叔元慶範鎮等坐法壽被州
郡切責時月相繼宗族甚患之弱冠州迎主簿後以母
老不復應州郡之命常盜殺脂牛以供其母招集壯士
常有百數母亡歲餘遇沈文秀崔道固起兵應劉子勛
明僧暲劉乘民起兵應劉彧攻討文秀法壽亦與清河
太守王玄邈起兵西屯合討道固玄邈以法壽爲司馬
累破道固軍甚爲歷城所憚加法壽紘邊將軍魏郡太
守子勛死道固文秀悉復歸彧乃罷兵道固慮其扇亂

百姓遂切遣之而法壽外託裝辦而內不欲行會從弟
崇吉在升城爲慕容白曜所破母妻沒於白曜軍崇吉
奔還舊宅法壽與崇吉年志粗相諧協而親則從祖兄
弟也崇吉以母妻見獲託法壽爲計法壽旣不欲南行
恨道固逼切又矜崇吉情理時道固以兼治中房靈質
督清河廣川郡事戍盤陽法壽遂與崇吉潛謀襲靈質
克之仍歸款於白曜以贖母妻白曜遣將軍長孫觀等
自大山南入馬耳關以赴盤陽還崇吉母妻初道固遣
軍圍盤陽法壽等拒守二十餘日觀軍至賊乃散走觀
軍入城詔以法壽爲平遠將軍與韓騏驎對爲冀州刺

史督上租糧以法壽從父弟靈民爲清河太守思順爲
濟南太守靈悅爲平原太守伯憐爲廣川太守叔玉爲
高陽太守叔玉兄伯玉爲河間太守伯玉從父弟思安
爲樂陵太守思安弟幼安爲高密太守以安初附及歷
城梁鄒降法壽崇吉等與崔道固劉休賓俱至京師以
法壽爲上客崇吉爲次客崔劉爲下客法壽供給亞於
安都等以功賜爵壯武侯加平遠將軍給以田宅奴婢
性好酒愛施親舊賓客率同飢飽坎壈常不豐足畢衆
敬等皆尚其通愛太和中卒贈平東將軍青州刺史謚
敬侯

子伯祖襲例降爲伯歷齊郡內史伯祖闇弱委事於功
曹張僧皓僧皓大有受納伯祖衣食不充後廣陵王羽
爲青州伯祖爲從事中郎平原相轉幽州輔國長史坐
公事免官卒

子翼襲宣威將軍大城戍主永安中青州太傅開府從
事中郎

伯祖弟叔祖別以功賜爵魏昌子歷廣陵王國郎中令
長廣東萊二郡太守龍驤將軍中散大夫永安中安東
將軍郢州刺史
叔祖弟幼愍安豐新蔡二郡太守坐事奪官居家忽聞

有客聲出無所見還至庭中爲家羣犬所噬遂卒初長孫觀之將至盤陽也城中稍以震懼時劉彧給事中崔平仲欲歸江南自歷下至圍城軍中與十餘騎遙共法壽語靈賓密遣人捕執之始法壽克盤陽之後常禁靈賓於別齋既得平仲引與同室致酒食叙國軍明將入意夜中北城上縋出平仲靈賓等十餘人厥明官軍至城靈賓遂歸梁鄒

靈賓文藻不如兄靈建而辯悟過之靈建在南官至州治中渤海太守以才名見稱兄弟俱入國爲平齊民雖流漂屯圯操尚卓然並卒於平齊

靈建子宣明亦文學著稱雅有父風高祖擢爲中書博士遷洛轉議郎試守東清河郡正始中京兆王愉出除征東冀州以宣明爲記室參軍愉反逼宣明爲太守靈賓從父弟堅字千秋少有才名亦內徙爲平齊民泰和初高祖擢爲祕書郎遷司空諮議齊州大中正高祖臨朝令諸州中正各舉所知千秋與幽州中正陽尼各舉其子高祖曰昔有一祁名垂往史今有二奚當聞來牒出爲濮陽太守世宗時復爲司空諮議加立忠將軍卒贈南青州刺史謚曰懿

長子祖淵羽林監從章武王融討葛榮沒於陳贈安東

將軍濟州刺史

祖淵弟祖皓長水校尉後討蕭衍將於九山戰歿贈撫軍將軍兗州刺史

崔平仲自東陽南奔妻子於歷城入國太和中高祖聽其還南

思安有勇力伯玉果敢有將略思安賜爵西安子建威將軍北平太守遷大司馬司馬齊州武昌王府司馬高祖南伐徵爲步兵校尉直閣將軍中統軍善撫士衆高祖嘉之漢陽旣平復爲武昌王司馬帶東魏郡太守加寧朔將軍改爵清河子卒官子敬寶襲爵

敬寶亦壯健奉朝請征北中兵參軍北征統軍寧遠將軍每有戰功早卒

子去病襲

伯玉坐弟叔玉南奔徙於北邊後亦南叛爲蕭鸞南陽太守高祖南伐剋宛外城命舍人公孫延景宣詔於伯玉曰天無二日土無兩王是以躬總六師蕩一四海宛城小戍豈足以禦抗王威深可三思封侯胙土事在俯仰伯玉對曰外臣荷國厚恩奉任疆境爲臣之道未敢聽命伏惟遊鑿遠涉願不損神高祖又遣謂曰朕親率麾旆遠清江沔此之小戍豈足徘徊王師但戎輅所經

續介須殄宜量力三思自求多福且卿早蒙蕭蹟殊常之眷曾不懷恩報以塵露蕭鸞妄言入繼道成蹟子無子遺卿不能建忠於前君方立節於逆豎卿之罪一又頃年傷我偏師卿之罪二今鑿旆親戎清一南服不先面縛待罪麾下卿之罪三卿之此戍多則一年中則百日少則三旬尅殄豈遠宜善思之後悔無及伯玉對曰昔蒙武帝愷悌之恩忝侍左右此之厚遇無忘夙夜但繼主失德民望有歸主上龍飛踐極光紹太宗非直副億兆之深望實兼武皇之遺勅是以懃懃懇懇不敢失墜往者北師深入寇攘邊民輒厲將士以救蒼生此乃

邊戍常事陛下不得垂責及尅死伯玉面縛而降高祖引見伯玉并其參佐二百人詔伯玉曰朕承天馭宇方欲清一寰域卿最介小戍敢拒六師卿之愆罪理在不赦伯玉對曰臣旣小人備荷驅使緣百口在南致拒皇略罪合萬死高祖曰凡立忠抱節皆應有所至若奉逆君守迷節古人所不爲卿何得事逆賊蕭鸞自貽伊譴伯玉對曰臣愚癡晚悟罪合萬斬今遭陛下願乞生命高祖曰凡人惟有兩途知機獲福背機受禍勞我王師彌歷歲月如此爲降何人有罪且朕前遣舍人公孫延景城西共卿語云天無二日土無二王卿答云在此不

在彼天道攸遠變化無方卿寧知今日在此不在彼乎
伯玉乞命而已更無所言高祖以思安頻爲伯玉泣請
故特宥之伯玉在南之日放妾楊氏爲尼入國遂令還
俗復愛幸焉爲有司所奏高宗聽之世宗卽位拜長史
兼游擊將軍出爲馮翊相卒官

崇吉少驍勇爲沈文秀中兵參軍及太原戍守傅靈越
率衆棄郡南赴子勛文秀以崇吉督郡事旣而背文秀
同於劉彧母叔在歷城爲崔道固所拘繫又將致刑於
市以恐之而崇吉卒無所顧會道固歸彧乃出其母彧
以崇吉爲龍驤將軍并州刺史領太原太守戍升城崇

吉以其從兄靈獻爲長史姨兄賈延年爲司馬未幾而
白曜軍至白曜遣人招之崇吉不降遂閉門固守升城
至小人力不多勝仗者不過七百人而白曜侮之乃遣
衆陵城崇吉設土簾方梁下相舂擊不時尅殄白曜遂
築長城圍三重更造攻具日夜攻擊自二月至四月糧
矢俱盡崇吉突圍出走遁藏民舍母妻見獲道固遣治
中房靈賓慰引之崇吉不肯見道固遂東歸舊村陰募
壯士欲以偷母還奔河南白曜慮其如此守備嚴固後
與法壽取盤陽俱降及立平齊郡以歷城民爲歸安縣
崇吉爲縣令頗懷昔憾與道固接事意甚不平後委縣

出臺訟道固罪狀數條會赦不問崇吉乞解縣許之停
京師半歲乃南奔崇吉夫婦異路剃髮爲沙門改名僧
達投其族叔法延住歲餘清河張略之亦豪俠士也崇
吉遺其金帛得以自遣妻從幽州南出亦得相會崇吉
至江東尋病死

崇吉從父弟三益字敬安於南陽內附高祖與語善之
曰三益了了殊不惡拜員外散騎侍郎尋出爲太山太
守轉兗州左軍府司馬所在以清河著稱還除左將軍
正光中卒年六十三九子

長子士隆興和中東清河太守帶盤陽鎮將

士隆弟士達少有才氣其族兄景先有鑒識每曰此兒
俶儻終當大其門戶起家濟州左將軍府倉曹參軍時
京兆王繼爲大將軍出鎮關右聞其名徵補騎兵參軍
領帳內統軍孝昌中其鄉人劉蒼生劉鈞房須等作亂
攻陷郡縣頻敗州軍時士達父憂在家刺史元欣欲逼
其爲將士達以禮固辭欣乃命其友人馮元興謂之曰
今合境從逆賊徒轉熾若萬一陷州君家豈得獨全旣
急病如此安得顧名教也士達不得已而起率州郭之
人二千餘人東西討擊悉破平之武泰初就家拜平原
太守抑挫豪彊境內肅然時邢杲寇亂憚其威名越郡

城西度不敢攻逼永安末轉濟南太守士達不入京師而頻爲本州郡時人榮之永安末朱兆入洛刺史蕭贊爲城民趙洛周所逐城內無主洛周等以士達鄉情所歸乃就郡請之命攝州事永熙二年卒年三十八時人傷惜之贈平東將軍齊州刺史謚曰武士達弟士素武定末太尉諮議參軍

士素弟士章尚書郎

法壽族子景伯字長暉高祖諶避地渡河居於齊州之東清河繹幕焉祖元慶仕劉駿歷士那太守後爲沈文秀青州建威府司馬劉彧之殺子業自立也子業弟子

勛起兵攻之文秀遣其將劉珍之率兵助彧後彧歸于子勛元慶不同爲文秀所害父愛親率勒鄉部攻文秀劉彧嘉之起家授龍驤將軍尋會文秀降彧乃止顯祖時三齊平隨例內徙爲平齊民以父非命䟽服終身景伯生於桑乾少喪父以孝聞家貧傭書自給養母甚謹尚書盧淵稱之於李冲冲時典選拔爲奉朝請司空祭酒給事中尚書儀曹郎除齊州輔國長史值刺史死勅行州事政存寬簡百姓安之後值清河太守杜昶外叛郡居山險盜賊群起除清河太守郡民劉簡虎曾失禮於景伯聞其臨郡闔家逃亾景伯督切屬縣捕擒之

卽署其子爲西曹掾命喻山賊賊以景伯不念舊惡一時俱下論者稱之舊守令六年爲限限滿將代郡民韓靈和等二百餘人表訴乞留復加二載後遷太尉中郎司徒諮議參軍輔國將軍司空長史以母疾去官景伯性淳和涉獵經史諸弟宗之如事嚴親及弟 亾蔬食終喪甚不內御憂毀之容有如居重其次弟景先亾其幼弟景遠甚年哭臨亦不內寢鄉里爲之語曰有義有禮房家兄弟廷尉卿崔先韶好標榜人物無所推尚每云景伯有士大夫之行業及母亾景伯居喪不食鹽菜因此遂爲水病積年不愈孝昌三年卒于家時年五十

贈左將軍齊州刺史

子文烈武定中尚書三公郎中

景先字光胄幼孤貧無資從師其母自授毛詩曲禮年十二請其母曰豈可使兄傭賃以供景先也請自求衣然後就學母哀其小不許苦請從之遂得一羊裘忻然自足晝則樵蘇夜誦經史自是精勤遂大通瞻太和中例得還鄉郡辟功曹州舉秀才值州將卒不得對策解褐太學博士時太常劉芳侍中崔光當世儒宗歎其精博光遂奏兼著作佐郎修國史尋除司徒祭酒貞外郎侍中穆紹又啟景先撰世宗起居注累遷步兵校尉領

尚書郎齊州中正所歷皆有當官之稱景先沈敏方正
事兄恭謹出告反面晨昏參省側立移時兄亦危坐相
敬如對賓客兄曾寢疾景先侍湯藥衣冠不解形容毀
瘁親友見者莫不哀之神龜元年蕭衍龍驤將軍田甲
能據東義陽城內屬勅景先爲行臺發二荆兵以援之
在軍遇疾而還其年卒於家時年四十三贈持節冠軍
將軍洛州刺史謚曰文景先作五經疑問百餘篇其言
該典今行於時文多略舉其切於世教者

問王者受命木火相生曰五精代感稟靈者興金德方
隆禎發華渚水運告昌瑤光啟祚人道承天天理應實

受謝旣彰玄命若契相生之義有允不違至如湯武革
命殺伐是用水火爲次遵而不改旣事垂代終而數同
納麓逆順且殊禎運宜異而兆徵不差有疑符應

問禹以鮌配天舜不尊父曰明明上天下土是冒道高
者負辰四方神積者郊原斯生是以則天不能私其子
紹堯不敢尊其父鮌旣罪彰於山川受殛於羽裔化質
與鱗甲爲羣銘精不能上乘箕尾而厚尊配於國陽當
升煙之大禮苟存及躬以亂祀典降上帝爲罪鬼之賓
奏夾鍾爲介蟲之樂奉天之道不乃有淪乎

問湯尊稷廢柱曰神積道存異世同尊列山見享綿紀

前代成湯革命承天當愆陽之運不思理數之有時黜
元功於百世且畢箕感應風雨異徵尊播殖之靈而邀
滂澍之潤升廢之道無乃謬與若柱不合薦虞夏應失
之於前如以歲久宜遷百神可計日而代求之二三未
究往旨

問湯尅桀欲遷夏社爲不可武王滅紂以亳社爲亾國
之誡曰神無定方唯人爲主道協無爲天地是依棄德
佛崇百靈更祀周武承天禮存咸秩升后稷當四圭之
尊貶土祗隔牲幣之享就如言之稷稟靈威誠允聿追
之宜社非商祖孝孚乃考之咎殷鑒致誠何獨在斯

問易著革命之爻而無揖讓之象曰玄黃剖別人道爲
尊含靈佇化故義始元首是以飛龍啟徵大人載就及
理運相推帝圖異序虞賓以爲善終順守有慙未盡不
顯揖讓之象而著巳日之美豈可兆巨釁爲貽厥之謀
訓萬世而開安忍之闕求之反衷未識理恕

問周禮秋官司烜氏邦若屋誅爲明竈焉曰王道貴產
法理尚恩舊德見食八象載其美五宥三刺禮經寶其
仁是以祿父巨釁殷禮不輟三監亂德蔡胤猶存罪莫
極於無上逆莫甚於違天行大辟禍不及族理正刑愆
止於身何惡當參夷之禍何戾受淪殄之辜

問儀禮繼母出嫁從爲之服傳云貴終其恩曰繼母配父本非天屬與尊合德名義以興兼鞠育有加禮服是重旣體違義盡棄節毀慈作嬪異門爲鬼他族神道不全何終恩之有方齊服是追哭於野次苟存降重無乃過猶不及乎

問禮記生不及祖父母父母稅喪已則否曰服以恩制禮由義立慈母三年孫無總葛者以戚非天屬報養止身祖雖異域恩不及已但正體於下可無服乎且縞冠玄武子姓之服縗練之後纓絰已除猶懷慘素未忍從吉況斬焉初之創巨方始復弔之賓尚改緇襲奉哀苦次而無追變孝子孝孫豈天理是與

問左氏傳齊人殺哀姜君子以爲不可曰受醮從天人倫所重保育異宗承奉郊莫而乃肆極昏淫禍傾合鬻之尊怙亂無終殄滅誕鞠之愛齊桓匡翼四方正存刑矩割不忍之恩行至公之法方生貶違以殺爲甚而神道幽默禍降末期雖窮勃履朝臣不宜糾旣事反人靈咎將有所施之取衷孰爲優允

問公羊傳王者之後郊天曰神不謬享帝無妄尊介丘偏祀猶不歆季氏之旅昊天至重豈可納廢饗之虔唐虞已往事無斯典三后已降始見其文揖讓之胄禮不

上通昏禘後燼四圭是主此便至道相承乾無二統純
風既設玄牡肆尊禮不虛革庶昭異聞

問穀梁傳魯僖二十一年夏四月卜郊不從乃免牲傳
曰乃者亾乎人之辭也曰樂以觀風禮爲教本其細已
甚民不堪命齊不加兵屈於周典僖公魯之盛君告誠
虔祀穆卜迎吉而休徵不至若推咎於天則神不棄鑒
歸愆於人則頌聲宜替既命龜失辰靈威弗眷郊享不
從配天斯缺卽傳所言殆非虛美何承而制

問尚書胤征羲和詰其罪乃季秋月朔辰弗合於房曰
衡紀不移日月有度炎涼啟辰次舍無代履端屢臻歸
餘成閏是以爰命羲和升準祖節使晷數應時火流協
運致望舒後律耀靈爽次卽官闕永容可爲愆玄象一
差未成巨戾且杪秋豈固星之辰授衣非合璧之月叙
食弗當積失加誅律度暫差便遘殄絕仁者之兵義不
妄興王赫斯舉將有異說

問毛詩十月之交朔日辛卯日有食之亦孔之醜曰日
月次周行舍有常分至之候不爲愆咎今同之辰而爲
深戾者專以金木相殘指日成釁推步不一容可如之
若謫見正陽日維戊午生育相因猶子歸母但以陰陽
得無深忌乎若爲忌也朔亦應爲災如不忌也辛卯豈

獨成醜且舉凡之始以屬月時繫之在日有爽明例義
不妄構理用何依

問論語河不出圖泣麟自傷曰聖人稟靈天地資識未
形齊生死於一同等榮辱於彼我孔子自生不辰從心
告齒樂正既脩素王斯著方與吾已之歎結反袂之悲
進涉無上之心退深負杖之懼聖達之理無乃缺如符
璽郎王神貴答之名為辯疑合成十卷亦有可觀前廢
帝時奏上之帝親自執卷與神貴往復嘉其用心特除
神貴子鴻彥為奉朝請

景先子延祐武定末太子家令

景遠字叔遐重然諾好施與頻歲凶儉分贍宗親又於
通衢以食餓者存濟甚衆平原劉郁行經齊究之境忽
遇劫賊已殺十餘人次至郁郁呼曰與君鄉近何忍見
殺賊曰若言鄉里親親是誰郁曰齊州主簿房陽是我
姨兄陽是景遠小字賊曰我食其粥得活何得殺其親
遂還衣服蒙活者二十餘人景遠好史傳不為章句天
性小急不類家風然事二兄至謹撫養兄孤恩訓甚篤
益州刺史傅豎眼慕其名義啟為昭武府功曹參軍以
毋老不應豎眼頗恨之卒於家

子敬道永熙中開府參軍事

史臣曰嚴稜夙款可嘉修之晚有誠効唐和萬里慕義
歸身著績休賔窮而委質法壽伯玉未能投命景伯兄
弟儒風雅業良可稱焉

列傳第三十一

魏書四十三

列傳第三十二

魏書四十四

羅結

伊跋

乙瓌

和其奴

苟頽

薛野脂

宇文福

費于

孟威

羅結代人也其先世領部落為國附臣劉顯之謀逆也
太祖去之結翼衛鑾輿從幸賀蘭部後以功賜爵屈蛇
侯太宗時除持節散騎常侍寧南將軍河內鎮將世祖
初遷侍中外都大官摠三十六曹事年一百七歲精爽
不衰世祖以其忠慈甚見信待監典後宮出入臥內因
除長信卿年一百一十詔聽歸老賜大寧東川以為居

業并爲築城卽號曰羅侯城至今猶存朝廷每有大事
驛馬詢訪焉年一百二十歲卒贈寧東將軍幽州刺史
謚曰貞

子斤太宗時爲侍御中散後從世祖討赫連昌世祖追
奔入城昌邀擊左右多死斤力戰有功世祖嘉之後錄
勲除散騎常侍侍中四部尚書又加平西將軍後平涼
州攻城野戰多有克捷以功賜爵帶方公除長安鎮都
大將會蠕蠕侵境馳駟徵還除柔玄鎮都大將後以斤
機辯勅與王俊使蠕蠕迎女備後宮又以本將軍開府
爲長安鎮都大將卒贈本將軍雍州刺史謚曰靜陪葬

金陵

子敦襲爵有姿貌善舉止自太子洗馬稍遷散騎常侍
庫部尚書卒贈安東將軍幽州刺史謚曰恭

子伊利高宗時襲爵除內行長以沉密小心恭勤不怠
領御食羽獵諸曹事伊利曾病顯祖幸其宅自視醫藥
其見待如此稍遷散騎常侍儀曹尚書出爲安東將軍
兗州刺史善撫導在州數年邊民歸之五千餘戶高祖
時蠕蠕來寇詔伊利追擊之不及而反後依例降爲侯
除司農卿光祿大夫卒世宗初贈征北將軍燕州刺史
謚曰靜

子阿奴亦忠實寡言有智度以勲臣之子除侍御中散襲爵稍遷中散大夫卒

子殺鬼襲爵武泰中驃騎將軍南青州刺史

敦弟拔歷殿中尚書賜爵濟南公高祖時進爵為王除征西將軍吏部尚書改封趙郡王後例降為公卒贈寧東將軍定州刺史謚曰康陪葬金陵

子道生肆州安北府外兵參軍卒

子延天興中驃騎將軍左光祿大夫

結從子渥渥子提並歷通顯提從世祖討赫連昌有功賜昌女為妻

子雲早有名位顯祖時給事中西征勅勒為賊所襲殺

子蓋世宗時右將軍直閣將軍轉龍驤將軍濟州刺史卒贈本將軍兗州刺史

長子鑿累遷冠軍將軍岐州刺史入除散騎常侍金紫光祿大夫主衣都統卒贈侍中都督冀定瀛三州諸軍事尚書右僕射司空公衛將軍冀州刺史以孝靜外戚故也

鑿弟衡累遷天水樂陵二郡太守輔國將軍光州刺史結宗人彌善射有膂力世祖時為軍將數從征伐有功官至范陽太守卒贈幽州刺史

彌孫念字子懷武定中驃騎將軍膠州刺史

伊穉代人也少而勇健走及奔馬善射多力曳牛却行神麈初擢爲侍郎轉三郎賜爵汾陽子加振威將軍世祖之將討涼州也議者咸諫唯司徒崔浩勸世祖決行羣臣出後穉言於世祖曰若涼州無水草何得爲國議者不可用也宜從浩言世祖善之旣尅涼州世祖大會於姑臧謂羣臣曰崔公智計有餘吾亦不復竒之吾正竒穉弓馬之士而所見能與崔同此深自可竒顧謂浩曰穉智力如此終至公相浩曰何必讀書然後爲學衛青霍去病亦不讀書而能大建勲名致位公輔世祖笑

曰誠如公言穉性忠謹世祖愛之親待日殊賞賜優厚真君初世祖欲拜穉爲尚書封郡公穉辭曰尚書務殷公爵至重非臣年少愚近所宜荷任請收過恩世祖問其欲穉曰中祕二省多諸文士若恩矜不已請參其次世祖賢之遂拜爲中護將軍祕書監以功賜爵魏安侯加冠軍將軍後出爲東雍州刺史恩化大行百姓思之轉殿中尚書常典宿衛世祖親任之後幸瓜步頻有戰功進號鎮軍將軍興安二年遷征北大將軍都曹尚書加侍中進爵河南公興光元年拜司空及爲三公清約自守爲政舉大綱而已不爲苛碎太安二年領太子太

保三年與司徒陸麗等並平尚書事五年薨

子蘭襲散騎常侍庫部尚書卒

子益生驍勇有膽氣初為統軍累有戰功遂為名將以勲賜爵平城子神龜二年自驍騎將軍直閣將軍為持節右將軍洛州刺史與荊州刺史淮南王世遵魯陽太守崔模俱討襄陽不尅而還坐免官後除安西將軍光祿大夫又為撫軍將軍太僕卿假鎮西將軍西道別將每戰頻捷自崔延伯之後益生為次焉進號征西將軍行岐州刺史復為西道都督戰歿贈車騎將軍雍州刺史永熙中重贈驃騎大將軍儀同三司定州刺史

子武平司徒祭酒

武平弟武榮直閣將軍

馘族孫豹子武衛將軍

豹子從子琳亦武衛將軍

乙瓌代人也其先世統部落世祖時瓌父匹知慕國威化遣瓌入貢世祖因留之瓌便弓馬善射手格猛獸膂力過人數從征伐甚見信待尚上谷公主世祖之女也除鎮南將軍駙馬都尉賜爵西平公從駕南征除使持節都督前鋒諸軍事每戰身先士卒勇冠三軍後除侍中征東將軍儀同三司定州刺史進爵為西道都將和

平中薨時年二十九贈太尉公謚曰恭

子乾歸襲爵年十二爲侍御中散及長身長八尺有氣
幹頗習書疏尤好兵法復尚恭宗女安樂公主除駙馬
都尉侍中顯祖初除征西將軍秦州刺史有惠政高祖
初卽位爲征西道都將又爲中道都將延興五年卒時
年三十一贈左光祿大夫開府儀同謚曰康

子海字懷仁少歷侍御中散散騎侍郎卒時年四十一
贈散騎常侍衛將軍濟州刺史謚曰孝

子瑗字雅珍尚淮陽公主高祖之女也除駙馬都尉汝
南王友固辭不拜歷濟南太守時爲逆賊劉桃攻郡瑗

踰城獲免後都督李叔仁討桃平之瑗乃還郡後除司
農少卿銀青金紫左右光祿大夫中軍將軍西兗州刺
史天平元年舉兵應樊子鵠與行臺左丞宗顯戰敗死
時年四十六

瑗弟諧字遵和武定中司馬

諧弟琛字仲珍解褐司空參軍事稍遷東平濟陰二郡
太守散騎常侍卒時年四十九

和其奴代人也少有操行善射御初爲三郎轉羽林中
郎以恭勤致稱賜爵東陽子除奮武將軍高祖初遷尚
書加散騎常侍進爵平昌公拜安南將軍遷尚書左僕

射太安元年詔羣臣議立皇太子名其奴與司徒麗等以爲宜以德命名帝從之又與河東王閭毗太宰常英等並平尚書事在官慎法不受私請時以西征吐谷渾諸將淹停不進久囚未決其奴與尚書毛法仁等窮問其狀連日具伏和平六年遷司空加侍中高宗崩乙渾與林金閭擅殺尚書楊保年等殿中尚書元郁率殿中宿衛士欲加兵於渾渾懼歸咎於金閭執金閭以付郁時其奴以金閭罪惡未分乃出之爲定州刺史皇興元年長安鎮將東平王道符反詔其奴領征西大將軍率殿中精甲萬騎以討之未至而道符敗軍還二年薨內外咸歎惜之贈平昌王謚曰宣

卒子天受襲爵初爲內行令太和六年遷弩庫曹下大夫

苟頽代人也曾祖烏提登國初有勲於太祖賜吳寧子父洛跋內行長頽性厚重少言嚴毅清直武力過人擢爲中散小心謹敬世祖南討以頽爲前鋒都將每臨敵對戰常先登陷陳世祖至江賜爵建德男加寧遠將軍還遷奏事中散典涼州作曹遷內行令轉給事中遷司衛監以本將軍拜洛州刺史爲政剛嚴抑彊扶弱山蠻畏威不敢爲寇承明元年文明太后令百官舉不堪幹

事人足委此者於是公卿咸以頽應選徵拜散騎常侍殿中尚書進爵成德侯加後將軍太和元年加散騎常侍尋遷侍中安東將軍都曹尚書進爵河南公頽方正好直言雖文明太后生殺不允頽亦言至懇切未曾阿諛李訢李敷之誅也頽並致諫太后不從三年遷征北大將軍司空公進爵河東王以舊老聽乘步挽杖於朝大駕行幸三川頽留守京師沙門法秀謀反頽率禁衛收掩畢獲內外晏然駕還飲至文明太后曰當爾之日卿若持疑不卽收捕處分失所則事成不測矣今京畿不擾宗社獲安者實卿之功也七年詔曰頽爲台鼎論

道是寄歷奉四朝庸績彌遠宜加崇異以彰厥功自茲已後可永受復除十三年冬薨高祖痛悼者久之贈贈有加謚僖王

長子愷累遷冠軍將軍柔玄懷荒武川鎮大將襲爵河東王例降爲公正光二年卒贈平北將軍恒州刺史子寶武定中北梁太守愷弟養步兵校尉早卒

養弟資武騎侍郎河間太守太僕少卿汲郡太守遷龍驤將軍肆州刺史還除武衛將軍加後將軍延昌末卒贈平北將軍并州刺史并給帛二百疋布一百匹謚曰

愍

子景蠻莊帝時撫軍將軍金紫光祿大夫

顏弟若周散騎常侍尚書太和中安南將軍豫州刺史
顏川侯卒贈光祿大夫

若周弟壽樂太和中北部尚書安南將軍懷州刺史假
山陽公未拜尋除散騎常侍殿中尚書晉安侯卒贈安
東將軍冀州刺史

顏從叔孤少以忠直稱太宗卽位以定策功拜車騎將
軍後除鎮軍大將軍并州刺史博陵公不治產業死之
日家無餘財百姓追思之

薛野胙代人也父達頭自姚萇時率部落歸國太祖嘉
其忠款賜爵聊城侯散員大夫待以上客之禮賜妻鄭
氏達頭閑雅恭慎太祖深器之卒贈平南將軍冀州刺
史謚曰悼野胙少失父母養於宗人利家及長好學善
射高宗初召補羽林遷給事中典民籍事校計戶口號
爲稱職賜爵順陽子野胙少孤父侯不襲至是錫爵和
平中除平南將軍并州刺史進爵河東公轉太州刺史
在治有聲卒年六十一贈散騎常侍大將軍并州刺史
謚曰簡

子虎子姿貌壯偉明斷有父風年十三入侍高宗大安

中遷內行長典奏諸曹事當官正直內小憚之及文明
太后臨朝出虎子爲枋頭鎮將虎子素剛簡爲近臣所
疾因小過黜爲鎮門士及顯祖南巡次於山陽虎子拜
訴於路曰臣昔事先帝過霑重恩陛下在諒闇之日臣
橫罹非罪自擯黜此蕃已經多載不悟今日得奉聖顏
遂流涕嗚咽顯祖曰卿先帝舊臣久屈非所良用憮然
詔虎子侍行訪以政事數十里中占對不絕時山東飢
饉盜賊競起相州民孫誨等五百餘人稱虎子在鎮之
日土境清晏訴乞虎子乃復除枋頭鎮將卽日之任至
鎮數州之地姦徒屏跡顯祖爾書慰喻後除平南將軍

相州刺史顯祖崩不行太和二年襲爵三年詔虎子督
三將出壽春與劉昶南討四年徐州民桓和等叛逆屯
於五固詔虎子爲南征都副將與尉元等討平之以本
將軍爲彭城鎮將至鎮雅得民和除開府徐州刺史時
州鎮戍兵資絹自隨不入公庫任其私用常苦飢寒虎
子上表曰臣聞金湯之固非粟不守韓白之勇非糧不
戰故自用兵以來莫不先積粟然後圖兼并者也今江
左未賓鯨鯢待戮自不委粟彭城以彊豐沛將何以拓
定江關掃一衡霍竊惟在鎮之兵不減數萬資糧之絹
人十二匹卽自隨身用度無準未及代下不免飢寒論

之於公無毫釐之潤語其利私則橫費不足非所謂納
民軌度公私相益也徐州左右水陸壤沃清汴通流足
盈激灌其中良田十萬餘頃若以兵絹市牛分減戍卒
計其牛數足得萬頭興力公田必當大獲粟稻一歲之
中且給官食半兵賴植餘兵尚衆且耕且守不妨捍邊
一年之收過於十倍之絹暫時之耕足充數載之食於
後兵資唯須內庫五稔之後穀帛俱溢匪直戍士有豐
飽之資於國有吞敵之勢昔杜預田宛葉以平吳充國
耕西零以彊漢臣雖識謝古人任當邊守庶竭塵露有
增山海高祖納之又上疏曰臣聞先王建不易之軌萬

代承之聖主垂不刊之制千載共仰伏惟陛下道洽羣
生恩齊造化仁德所覃迹超前哲遠崇古典留意治方
革前王之弊法申當今之宜用定貢賦之輕重均品秩
之厚薄庶令百辟足以代耕編戶享其餘畜魏乎煥焉
不可量也臣竊尋居邊之民蒙化日淺戎馬之所資計
素微小戶者一丁而已計其徵調之費終歲乃有七縑
去年徵責不備或有貨易田宅質妻賣子呻吟道路不
可忍聞今淮南之人思慕聖化延頸企足十室而九恐
聞賦重更懷進退非惟損皇風之盛慮傷慕義之心且
臣所居與南連接民情去就實所諳知特宜寬省以招

未至其小郡太守數戶而已一請止六尺絹歲不滿匹
既委邊捍取其必死邀之士重何吝君輕今班制已行
布之天下不宜忤冒以亂朝章但猥藉恩私備位蕃岳
憂貴之地敢不盡言書奏文明太皇太后令曰俸制已
行不可以小有不平便虧通式在州戍兵每歲交代虎
子必親自勞送喪者給其歛帛州內遭水二麥不收上
表請貸民粟民有車牛者求詣東充給之並如所奏民
得安堵高祖曾從容問祕書丞李彪曰卿頻使江南徐
州刺史政績何如彪曰綏邊布化甚得其和高祖曰朕
亦知之沛郡太守邵安下邳太守張攀咸以賊汚虎子

案之於法安等遣子弟上書誣虎子南通賊虜高祖曰
此其妄矣朕度虎子必不然也推案果虛乃下詔曰夫
君臣體合則功業可興上下猜懼則治道替矣沛郡太
守邵安下邳太守張攀咸以貪恠獲罪各遣子弟詣闕
告刺史虎子縱民通賊妄稱無端安宜賜死攀及子僧
保鞭一百配敦煌安息他生鞭一百可集州官兵民等
宣告行決塞彼輕狡之源開此陳力之效在州十一載
太和十五年卒年五十一贈散騎常侍鎮南將軍相州
刺史謚曰文有六子

長子世遵襲爵例降爲侯景明中爲秦州刺史稍遷左

將軍卒年四十二
長子忱字安民正光中襲爵稍遷鎮南將軍鉅鹿太守
定州儀同開府諮議參軍齊獻武王大行臺左丞中外
府司馬出爲殷州驃騎府長史武定五年除鎮北將軍
北廣平太守爲治暴虐曾因公事一家之內併殺數人
爲民所訟將致之罪遇患卒於郡贈征西將軍西兗州
刺史

忱弟安顥武定末東豫州征西府長史

世遵弟曇慶少有度量永平中負外散騎常侍遷尚書
郎年五十一卒

子衍字元孫輕財慕義熙平中爲侍御史奉朝請永安
中尚書駕部郎中行河陰縣事卒於正平太守贈征東
將軍徐州刺史

曇慶弟曇寶初補散騎高祖詔曇寶採遺書於天下歷
侍御中散直閤將軍太子步兵校尉世宗時遣使巡行
四方以曇寶持節兼散騎常侍龍驤將軍南道大使曇
寶達豫州卒年二十九

曇寶弟曇尚有容貌性寬和初辟御史加奉朝請熙平
二年除徐州穀陽戍主行南陽平郡事母憂去職正光
中詔以陽平隣接蕭衍綏捍須人仰尚書舉才而遣左

僕射蕭寶寅舉曇尚應選馳駟之郡孝昌初徐州刺史元法僧叛入蕭衍曇尚斬其使人送首於都督安樂王鑒鑒不能接遂爲蕭衍將王希舛所陷拘曇尚送蕭衍衍以禮遇之曇尚乞歸衍乃聽還肅宗復其本秩武泰初介朱榮擅彊并肆朝廷欲揣其情除曇尚貞外常侍使於榮託以慰喻密以觀之建義初除司徒左長史兼吏部尚書授太原王介朱榮官還賜爵永安侯尋除後將軍定州刺史介朱榮之死授持節兼尚書北道行臺代魏蘭根後爲鎮東將軍金紫光祿大夫太昌初加征東將軍行兗州事天平中除驃騎大將軍齊州刺史曇尚凡歷三州俱稱貪虐還除將作大匠卒於官年六十一贈都督瀛滄二州諸軍事本將軍儀同三司瀛州刺史

子仲芬武定中齊文襄王中外府中兵參軍

曇尚弟琬字曇珎武定末儀同三司尚書右僕射

宇文福河南洛陽人其先南單于之遠屬世爲擁部大人祖活撥仕慕容垂爲唐郡內史遼東公太祖之平慕容寶活撥入國爲第一客福少驍果有膂力太和初拜羽林郎將遷建節將軍賜爵新昌侯南征都將擊蕭贖有功授顯武將軍尋除恢武將軍北征都將特賜戎服

破蠕蠕別部獲萬餘還除都牧給事十七年車駕南討假冠軍將軍後軍將軍時仍遷洛勅福檢行牧馬之所福規石濟以西河內以東拒黃河南北千里爲牧地事尋施行今之馬場是也及從代移雜畜於牧所福善於將養並無損耗高祖嘉之尋補司衛監從駕豫州加冠軍將軍西道都將假節征虜將軍領精騎一千專殿駕後未幾轉驍騎將軍仍領太僕典牧令從駕征南陽兼武衛將軍二十二年車駕南討遣福與右衛將軍楊播爲前軍至鄧城福選兵簡將爲攻圍之勢高祖望福軍法齊整將士閑習大被裒歎蕭鸞遣其尚書崔慧景黃

明郎蕭衍率衆十萬來救高祖指麾將士勅福領高車羽林五百騎出賊南面奪其橋道遏絕歸路賊衆大恐六道來戰福據鞍誓衆身先士卒賊不得前遂大奔潰賜爵昌黎伯正武衛加征虜將軍尋以高車叛命加征北將軍北征都將追討之軍敗被黜景明初乃起拜平遠將軍南征統軍進計於都督彭城王勰曰建安是淮南重鎮彼此要衝得之則義陽易圖不獲則壽春難保勰然之及勰爲州遂令福攻建安建安降以勲封襄樂縣開國男邑二百戶除太僕少卿尋以衍將寇邊假節征虜將軍領兵出三關討之又詔福行豫州事與東豫

州刺史田益宗共相影援綏遏蠻楚還爲光祿大夫轉太僕卿延昌中以本官領左衛將軍除散騎常侍都官尚書加安東將軍營州大中正熙平初除鎮北將軍瀛州刺史福性忠清在公嚴毅以信御民甚得聲譽解任復除太僕卿又爲金紫光祿大夫出除散騎常侍都督懷朔沃野武川三鎮諸軍事征北將軍懷朔鎮將至鎮遇病卒詔遣主書樂安嘉赴弔贈車騎大將軍定州刺史開國如故謚曰貞惠

長子善字慶孫襲爵自司空掾稍遷平南將軍光祿大夫孝昌末北征戰歿贈車騎將軍冀州刺史

善弟延字慶壽體貌魁岸眉目踈朗永平中釋褐奉朝請直後負外散騎常侍以父老詔聽隨侍在瀛州屬大乘妖黨突入州城延率奴客戰死者數人身被重創賊乃小退而縱火燒齋閣福時在內延突火而入抱福出外支體灼爛髮盡爲燼於是勒衆與賊苦戰賊乃散走以此見稱孝昌中授假節建威將軍西道別將赴援關隴有戰功除負外散騎常侍轉直寢與万俟醜奴戰歿贈冠軍將軍豫州刺史

子仲鸞武定末齊王丞相府長流參軍

慶壽弟慶安歷給事中尚書殿中郎中後加平北將軍

武衛將軍河陰遇害贈征東將軍兗州刺史

長子仲融

融弟仲衍

費于代人也祖峻仕赫連昌爲寧東將軍泰常末率衆來降拜龍驤將軍賜爵犍爲公後遷征南將軍廣阿鎮大將徙爵下邳公父郁以隨父歸誠勲賜五等男除燕郡太守卒贈幽州刺史于少有節操起家內三郎世祖南伐從駕至江以宿衛之勤除寧遠將軍賜爵松陽男遷商賈部一曹令除平南將軍懷州刺史卒

子萬襲太和初除平南將軍梁國鎮將後高祖南伐萬從駕渡淮戰歿贈鎮東將軍冀州刺史

子穆字朗興性剛烈有壯氣頗涉書史好尚功名世宗

初襲男爵後除夏州別駕尋加寧遠將軍轉涇州平西

府長史時刺史皇甫集靈太后之元舅恃外戚之親多

爲非法穆正色匡諫集亦憚之轉安定太守仍爲長史

還朝拜左軍將軍轉河陰今有嚴明之稱時蠕蠕主婆

羅門自涼州歸降其部衆因飢侵掠邊邑詔穆銜命宣

慰便皆款附明年復叛入寇涼州除穆輔國將軍假征

虜將軍兼尚書左丞西北道行臺仍爲別將往討之穆

至涼州蠕蠕遁走穆謂其所部曰夷狄獸心唯利是視

見敵便走乘虛復出今主師來討雖畏威逃跡然軍還之後必來侵暴今欲羸師誘致冀獲一戰若不令其破膽終恐疲於奔命衆咸然之穆乃簡練精騎伏於山谷使羸劣之衆爲外營以誘之賊騎覘見謂爲信弱俄而競至穆伏兵奔擊大破之斬其帥郁厥烏介俟斤十代等獲生口雜畜甚衆及六鎮反叛詔穆爲別將隸都督李崇北伐都督崔暹失利崇將班師會諸將議曰朔州是白道之衝賊之咽喉若此處不全則并肆危矣今欲選諸將一人留以鎮捍不知誰堪此任命曰無過穆者崇乃請爲朔州刺史仍本將軍尋改除雲州刺史穆招離聚散頗得人心時北境州鎮悉皆淪沒唯穆獨據一城四面抗拒久之援軍不至兼行路阻塞糧仗俱盡穆知勢窮乃棄城南走投介朱榮於秀容旣而詣闕請罪詔原之孝昌中二絳蜀反以穆爲都督討平之拜前將軍散騎常侍遷平南將軍光祿大夫妖賊李洪於陽城起逆連結蠻左詔穆兼武衛將軍率衆討擊破於關口之南遷金紫光祿大夫正武衛將軍介朱榮向洛靈太后徵穆令屯小平及榮推奉莊帝河梁不守穆遂棄衆先降穆素爲榮所知見之甚悅穆潛說榮曰公士馬不出萬人今長驅向洛前無橫陳者正以推奉主上順民

心故耳既無戰勝之威羣情素不厭伏今以京師之衆
百官之盛一知公之虛實必有輕侮之心若不大行誅
罰更樹親黨公還北之日恐不得度太行而內難作矣
榮心然之於是遂有河陰之事天下聞之莫不切齒榮
入洛穆遷中軍將軍吏部尚書魯縣開國侯食邑八百
戶又領夏州大中正蕭衍遣將軍曹義宗逼荊州詔穆
爲使持節南征將軍都督南征諸軍事大都督以援之
穆潛軍徑進出其不意至卽大破之生擒義宗送闕以
功遷衛將軍進封趙平郡開國公增邑一千戶遷使持
節加侍中車騎將軍假儀同三司前鋒大都督與大將
軍元天穆東討邢杲破平之時元顥內逼莊帝北幸顥
入京師穆與天穆旣平齊地回師將繫顥穆先驅圍虎
牢盡銳攻之將拔屬天穆北渡旣無後繼人情離沮穆
遂降顥以河陰酷濫事起於穆引入詰讓出而殺之時
年五十三莊帝還宮追贈侍中司徒公謚曰武宣
長子慶遠永安中龍驤將軍青州開府司馬

第二子孝遠襲天平中叛入關西

孟威字能重河南洛陽人頗有氣尚尤曉北土風俗歷
東宮齊帥羽林監時四鎮高車叛投蠕蠕高祖詔威曉
喻禍福追還逃散分配爲民後以明解北人之語勅在

著作以備推訪永平中自鎮遠將軍前軍將軍左右直
長加龍驤將軍出使高昌還遷城門校尉直閣將軍沃
野鎮將正光初蠕蠕主阿那瓌歸國詔遣前郢州刺史
陸希道兼侍中爲使主以威兼散騎常侍爲副遠畿迎
接阿那瓌之還國也復以威爲平北將軍光祿大夫假
負外常侍爲使主護送之前後頻使遠蕃粗皆稱旨復
加撫軍將軍普泰中除大鴻臚卿尋加驃騎大將軍左
光祿大夫天平三年卒贈使持節侍中本將軍都督冀
瀛滄三州諸軍事司空公冀州刺史子恂嗣

威弟季稍遷鎮遠將軍左中郎將廷尉監以本將軍除

廣州刺史預介朱榮義舉封鉅鹿縣開國公食邑二千
戶除撫軍將軍廷尉卿轉司農卿出爲平西將軍華州
刺史卒贈車騎大將軍雍州刺史

史臣曰羅結枝附葉從當舊之眷子孫顯祿俱至公主
伊敏以勇力見擢而能替伐姑臧之策請參中祕之官
世祖嘉之於前良有以也乙瓌之驍猛和奴之真正苟
顏之剛直虎子之威彊宇文之氣幹咸亦有用之士費
穆出身致力遂有功名而未路一言禍被簪帶校之文
和異世同咎其死也幸哉孟威致力荒裔其勤可錄矣

羅結孫拔高祖時進爵濟南王拔孫延天興中驃騎

將軍案太祖初即位年號天興拔仕高祖其孫必非
太祖時蓋年號誤也

列傳第三十二

魏書四十四

列傳第三十三

魏書四十五

韋閔

杜銓

裴駿

辛紹先

柳崇

韋閔字友觀京兆杜陵人世為二輔冠族祖楷晉建威
將軍長樂清河二郡太守父達慕容垂吏部郎大長秋
卿閔少有器望值慕容氏政亂避地於薊城世祖徵拜
咸陽太守轉武都太守屬杏城鎮將郝温及蓋吳反關
中擾亂閔盡心撫納所部獨全在郡十六年卒
子範歷鎮西大將軍府司馬試守華山郡高宗時賜爵
興平男卒

子雋字頴超早有學識少孤事祖母以孝聞性溫和廉讓爲州里所稱太和中襲爵除荊州治中轉梁州寧朔府長史還爲太尉外兵參軍本州中正遷都水使者所在有聲世宗崩領軍于忠矯擅威刑與左僕射郭祚尚書裴植同時遇害語在植傳時年五十七雋與祚婚家爲忠所惡故及於難臨雋訴枉於尚書元欽欽知而不取申理雋歎曰吾一生爲善未蒙善報常不爲惡今爲惡終悠悠蒼天抱直無訴時人咸怨傷焉熙平元年追贈中壘將軍洛州刺史謚曰貞有子十三人

長子榮緒字子光頗涉文史襲爵除員外散騎侍郎齊王蕭寶寅儀同開府屬因戰敗歿

榮緒弟榮茂字子曄以幹局知名歷侍御史尚書考功郎中出爲征虜將軍東秦州刺史永熙末兄弟並歿關西

榮茂弟子榮爲寶炬南汾州刺史

子榮少弟道諧爲南汾州鎮城都督齊獻武王命將出討陷城克之武定末子榮官至南兗州刺史

閔兄子真喜起家中國書博士遷中書侍郎馮翊太守子祉卒於太府少卿

祉子義遠出帝時爲岐州刺史沒關西

社弟禎有識幹起家奉朝請尚書郎中司徒主簿太子中舍人廷尉少卿給事黃門侍郎光祿大夫卒贈安西將軍秦州刺史

子文殊貞外散騎侍郎早卒

閔從叔道福父罷爲苻堅丞相王猛所器重以女妻焉爲堅東海太守堅滅奔江左仕劉裕爲輔國將軍秦州刺史道福有志略歷劉駿盱眙南沛二郡太守領鎮北府錄事參軍時徐州刺史薛安都謀欲擁州內附道福叅贊其事以功除安遠將軍賜爵高密侯因此仍家於彭城卒贈征虜將軍兗州刺史謚曰簡

子欣宗以歸國勲別賜爵杜縣侯高祖初拜彭城內史遷大將軍宋王劉昶諮議參軍廣陵侯元衍爲徐州刺史又請爲長史帶彭城內史撫綏內外甚得民和世宗初除通直散騎常侍出爲河北太守不行尋轉太中大夫行幽州事卒贈龍驤將軍南兗州刺史謚曰簡

子元叡武定中潁州驃騎府長史

欣宗從父弟合宗卒於東海太守

子元恢有氣幹孝昌初值刺史元法僧據

叛元恢

招聚同志潛規克復事泄爲法僧所害時人傷惜之

閔從子崇字洪基父肅字道壽劉義真鎮關中辟爲主

簿仍隨義真度江歷魏郡弋陽二郡太守豫州刺史崇
第十歲父卒母鄭氏以入國因寓居河洛少爲舅兗州
刺史鄭羲所器賞解褐中書博士轉司徒從事中郎高
祖納其女爲充華嬪除南潁川太守不好發擿細事常
云何用小察以傷大道吏民感之郡中大治高祖聞而
嘉賞賜帛二百匹遷洛以崇爲司州中正尋除右將軍
咸陽王禧開府從事中郎復爲河南邑中正崇頻居衡
品以平直見稱出爲鄉郡太守更滿應代吏民詣闕乞
留復延二年任在郡九年轉司徒諮議久之除華山太守
卒

子猷之釋褐奉朝請轉給事中步兵校尉稍遷前將軍
太中大夫卒

猷之弟休之起家安州左將軍府城局參軍轉給事中
河南邑中正稍遷安西將軍光祿大夫休之貞和自守
未嘗以言行忤物卒

子道建武定末定州儀同開府長史帶中山太守

道建弟道儒齊文襄王大將軍府東閣祭酒

閔族弟珍字靈智高祖賜名焉父尚字文叔樂安王良
安西府從事中郎卒贈安遠將軍雍州刺史珍少有志
操解褐京兆王子推常侍轉尚書南部郎高祖初蠻首

桓誕歸款朝廷思安邊之略以誕爲東荊州刺史令珍爲使與誕招慰蠻左珍自懸瓠西入三百餘里至桐栢山窮淮源宣揚恩澤莫不降附淮源舊有祠堂蠻俗恒用人祭之珍乃曉告曰天地明靈卽是民之父母豈有父母甘于肉味自今已後悉宜以酒脯代用羣蠻從約至今行之凡所招降七萬餘戶置郡縣而還以奉使稱旨除左將軍樂陵鎮將賜爵霸城子蕭道成司州民謝天蓋自署司州刺史規欲以州內附事泄爲道成將崔慧景攻圍詔珍率在鎮士馬渡淮援接時道成聞珍將至遣將苟元賓據淮逆拒珍乃分遣鐵馬於上流潛渡

親率步士與賊對接旗鼓始交甲騎奄至腹背奮擊破之天蓋尋爲左右所殺降於慧景珍乘勝馳進又破慧景擁降民七千餘戶內徙表置城陽剛陵義陽三郡以處之高祖詔珍移鎮北陽蕭贖遣其雍州刺史陳顯達率衆來寇城中將士咸欲出戰珍曰彼初至氣銳未可便挫且共堅守待其攻我疲敝擊之未晚於是憑城拒戰殺傷甚衆相持旬有二日夜開城門掩擊之賊遂奔潰以功進爵爲侯車駕南討珍上便宜并自陳住邊歲久悉其要害願爲前驅詔珍爲隴西公源懷衛大將軍府長史轉太保齊郡王長史遷顯武將軍郢州刺史在

州有聲績朝廷嘉之遷龍驤將軍賜驊騮二匹帛五十疋穀三百斛珍乃召集州內孤貧者謂曰天子以我能綏撫卿等故賜以穀帛吾何敢獨當遂以所賜悉分與之尋加平南將軍荊州刺史與尚書盧淵征楮陽為蕭鸞將垣歷生蔡道貴所敗免歸鄉里臨別謂淵曰主上聖明志吞吳會用兵機要在於上流若有事荆楚恐老夫復不得停耳後車駕征樊郢復起珍為中軍大將軍彭城王勰長史沔北既平以珍為建威將軍試守魯陽郡高祖復南伐路經珍郡加中壘將軍正太守珍從至濟水高祖曰朕頃戎車再駕卿常翼務中軍今日之舉

亦欲與卿同行但三鷗險要非卿無以守也因勅珍辭還及高祖崩於行宮祕匿而還至珍郡始發大諱還除中散大夫尋加鎮遠將軍太尉諮議參軍永平元年卒時年七十四贈本將軍南青州刺史謚曰懿

長子纘字遵彥年十三補中書學生聰敏明辯為博士李彪所稱除祕書中散遷侍御中散高祖每與名德沙門談論往復纘掌綴錄無所遺漏頗見知賞轉散騎侍郎徙太子中舍人仍兼黃門又兼司徒右長史尋轉長兼尚書左承壽春內附尚書令王肅出鎮揚州請纘為長史加平遠將軍帶梁郡太守肅薨勅纘行州事任城

王澄代肅爲州復啟續爲長史澄出征之後蕭衍將姜慶真乘虛攻襲遂據外郭雖尋克復續坐免官永平三年卒年四十五

續弟彧字遵慶亦有學識解褐奉朝請遷太尉騎兵參軍出爲雍州治中轉別駕入爲司徒掾尋轉散騎侍郎稍遷平遠將軍東豫州刺史彧綏懷蠻左頗得其心蠻首田益宗子魯生魯賢先叛父南人數爲寇掠自彧至州魯生等咸戡啟修敬不復爲害或以蠻俗荒梗不識禮儀乃表立太學選諸郡生徒於州揔教又於城北置崇武館以習武焉境內清肅還遇大將軍京兆王繼西

征請爲長史拜通直散騎常侍尋以本官兼尚書爲幽夏行臺以功封陰盤縣開國男邑二百戶孝昌元年秋卒於長安贈撫軍將軍雍州刺史謚曰文

子彪襲歷本州治中轉別駕孝莊末藍田太守沒於關西彪弟融解褐負外散騎侍郎以軍功賜爵長安伯稍遷大司馬開府司馬融娶司農卿趙郡李瑾女天平中疑其妻與章武王景哲姦通乃刺殺之懼不免仍亦自害彧弟肅字遵顯少有志業年十八辟州主簿時屬歲儉肅以家粟造粥以飼飢人所活甚衆解褐太學博士遷祕書郎中稍遷左軍將軍爲荆郢和糴大使南郢州刺

史田夷啟稱肫父珍往任荊州恩洽夷夏乞肫充南道
別將領荊州驍勇共爲腹背詔從之未幾行南荊州事
肅宗末除征虜將軍東徐州刺史尋遷安東將軍加散
騎常侍蕭衍遣其郢州刺史田麤禧率衆來寇肫於石
羊岡破斬之以功封杜縣開國子邑二百戶永安三年
卒於州贈侍中車騎將軍雍州刺史謚曰宣

長子鴻字道衍頗有幹用解褐奉朝請遷尚書令吏部
郎中中書舍人天平三年坐漏泄賜死於家時年三十
二

鴻弟道植武定末儀同開府中兵參軍

太祖時有安定梁頴先仕慕容寶歷黃門郎入國拜建
德太守賜爵朝那男

孫景雋起家趙郡王幹行參軍稍遷治書侍御史司徒
中兵參軍卒

子師禮早卒

師禮族弟嵩遵少有氣俠起家奉朝請歷司空外兵參
軍後蕭寶寅爲雍州刺史引爲中兵參軍深見信任寶
寅反令嵩遵率衆出征嵩遵僞受其署旣行之後遂與
侯終德等還來襲城以功封烏氏縣開國伯邑五百戶
後除光州平東府長史轉荊州驃騎府司馬卒官年四

十四

嵩遵弟嵩景武定中燕郡太守又有武功

蘇湛字景雋魏侍中則之後也晉亂避地河右世祖平涼州還鄉里父擁字天祐秦州撫軍府司馬湛少有器行頗涉羣書年二十餘舉秀才除奉朝請領侍御史轉員外散騎侍郎蕭寶寅之討關西以湛爲行臺郎中深見委任孝昌中寶寅大敗東還朝廷以爲雍州刺史後自猜懼害中尉酈道元乃稱兵反時湛臥疾於家寶寅令姜儉報湛云元略受蕭衍意旨乃欲見除酈道元之來事不可測吾不能坐受死亾今便爲身計不復作魏

臣也與卿契闊故以相報死生榮辱與君共之湛聞之舉聲大哭儉遽止之曰何得便爾曰曰百口居家卽時屠滅云何不哭哭數十聲徐謂儉爲我白齊王王本以窮鳥投人賴朝廷假王羽翼榮寵至此屬國步多虞不能竭忠報德乃欲乘人間隙有不臧之心信惑行路無識之語欲以羸敗之兵守關問鼎今魏德雖衰天命未改且王之恩義未洽於民但見其敗未見有成蘇湛不能以百口居家爲王族滅寶寅復報曰此自救命之計不得不爾所以不先相白者恐沮吾計故爾湛復曰凡爲大事當得天下奇士今但共長安博徒小兒輩計

較辨有成理不堪恐荆棘必生庭閣願乞骸骨還鄉里
脫得因此病死可以下見先人寶寅素重之以湛病且
知不爲已用聽還武功寶寅敗莊帝卽位徵補尚書郎
旣至莊帝曰前聞卿答蕭寶寅甚有美辭爲我說也湛
頓首謝曰臣雖言辭不如伍被始終不易自謂過之然
臣與寶寅周遊契闊言得盡心而不能令其不反臣之
罪也莊帝悅拜散騎都尉仍領郎尋遷中書侍郎出帝
初病還鄉里終於家贈散騎常侍鎮西將軍雍州刺史
湛從母弟天水姜儉字文簡父昭自平憲司直出爲充
州安東長史帶高平太守卒於營構都將儉少有幹用

勤濟過人起家徐州車騎府田曹參軍轉太尉外兵參
軍蕭寶寅出討關西引爲開府屬軍機謀略多所參預
儉亦自謂遭逢知己遂竭誠委託寶寅爲雍州仍請爲
開府從事中郎帶長安令及寶寅反以爲左丞尤見信
任爲羣下所讎疾寶寅敗城人殺之時年三十九蘇湛
每謂人曰以姜儉才志堪致富貴惜其不遇命也如何
儉弟素武定末中散大夫

杜銓字士衡京兆人晉征南將軍預五世孫也祖胄苻
堅太尉長史父嶷慕容垂祕書監仍僑居趙郡銓學涉
有長者風與盧玄高允等同被徵爲中書博士初密太

后父豹喪在濮陽世祖欲命迎葬於鄴謂司徒崔浩曰天下諸杜何處望高浩對京兆爲美世祖曰朕今方改葬外祖意欲取京兆中長老一人以爲宗正命營護凶事浩曰中書博士杜銓其家今在趙郡是杜預之後於今爲諸杜之最即可取之詔召見銓器兒瓌雅世祖感悅謂浩曰此真吾所欲也以爲宗正令與杜超子道生迎豹喪柩致葬鄴南銓遂與超如親超謂銓曰既是宗近何緣復僑居趙郡乃延引同屬魏郡焉遷散騎侍郎轉中書侍郎賜爵新豐侯卒贈正南將軍相州刺史魏縣侯謚曰宣

子振字季元太和初舉秀才卒於中書博士

子遇字慶期起家奉朝請轉員外散騎侍郎尚書起部郎中竊官材瓦起立私宅清論鄙之遷龍驤將軍中散大夫出爲河東太守卒贈中軍將軍都官尚書豫州刺史謚曰惠

子鴻永熙中司徒倉曹參軍

銓族子洪太字道廓延興中爲中書博士後使高麗除安遠將軍下邳太守轉梁郡太守太和中除鷹揚將軍絳城鎮將帶新昌陽平二郡太守卒年五十二

子祖悅字士豁頗有識尚大將軍劉昶參軍事稍遷天

水仇池二郡太守行南秦州事正光中入爲太尉汝南王悅諮議參軍出除高陽太守卒於郡

子長文字子儒肅宗挽郎貞外散騎侍郎稍遷尚書郎以隨叔顓守岐州勲賜爵始平伯加平東將軍天平末卒於安西將軍光祿大夫贈中軍將軍度支尚書雍州

刺史

長文第四弟子達武定中齊文襄王大都督府戶曹參軍

祖悅弟顓字思顏頗有幹用解褐北中府錄事參軍正光中稍遷厲威將軍盱眙太守帶大徐戍主元法僧之

叛也顓逃竄獲免後爲諫議大夫孝昌二年爲西征軍司行岐州事蕭寶夤起逆顓據州不從還除征虜將軍東荊州刺史以守岐州勲封平陽縣開國伯邑五百戶武泰中轉授岐州刺史永安中除涇州刺史時万俟醜奴充斥關右不行乃爲都督防守岐州醜奴攻之不尅事寧除鎮西將軍光祿大夫以勲又賞安平縣開國伯食邑五百戶以平陽伯轉授第二子景仲後爲征西將軍金紫光祿大夫沒於關西

裴駿字神駒小名皮河東聞喜人父雙碩本縣令假建威將軍恒農大守安邑子卒贈平南將軍東雍州刺史

聞喜侯駿幼而聰慧親表異之稱爲神駒因以爲字弱冠通涉經史好屬文性方檢有禮度鄉里宗敬焉蓋吳作亂於關中汾陰人薛永宗聚衆應之屢殘破諸縣來襲聞縣中先無兵仗人情駭動縣令憂惶計無所出駿在家聞之便率厲鄉豪曰在禮君父有危臣子致命府縣今爲賊所逼是吾等徇節之秋諸君可不勉乎諸豪皆奮激請行駿乃簡驍騎勇數百人奔赴賊聞救至引兵退走刺史嘉之以狀表聞會世祖親討蓋吳引見駿駿陳叙事宜甚會機理世祖大悅顧謂崔浩曰裴駿有當世才具且忠義可嘉補中書博士浩亦深器駿目爲

三河領袖轉中書侍郎劉駿遣使明僧暲朝貢以駿有才學乃假給事中散騎常侍於境上勞接皇輿二年卒贈平南將軍秦州刺史聞喜侯謚曰康

子修字元寄清辯好學年十三補中書學生遷祕書中散轉主客令以婦父李訢事出爲張掖子都大將張掖境接胡夷前後數致寇掠修明設烽候以方略禦之在邊六年關塞清靜高祖嘉之徵爲中部令轉中大夫兼祠部曹事職主禮樂每有疑議修斟酌故實咸有條貫太和十六年卒時年五十一高祖悼惜之賜帛一百疋謚曰恭伯世宗時追贈輔國將軍東秦州刺史修早孤

居喪以孝聞二弟三妹並在幼弱撫養訓誨甚有義方
次弟務早喪修哀傷之感於行路愛育孤姪同於已子
及將異居奴婢田宅悉推與之時人以此稱焉

子詢字敬叔美儀貌多藝能音律博奕咸所開解起家
奉朝請太尉集曹參軍轉長流尚書起部郎中平昌太
守時太原長公主寡居與詢私姦肅宗仍詔詢尚焉尋
以主壻特除散騎常侍時本邑中正闕司徒召詢爲之
詢族叔昞自陳情願此官詢遂讓焉時論善之尋監起
居事遷祕書監出爲平南將軍郢州刺史詢以凡司戍
土蠻酋田朴特地居要險衆踰數萬足爲邊捍遂表朴

特爲西郢州刺史朝議許之肅衍遣將李國興寇邊時
四方多事朝廷未遑外略緣境城戍多爲國興所陷賊
旣乘勝遂向州城詢率厲固守垂將百日援軍旣至賊
乃退走加散騎常侍安南將軍朴特自國興來寇便與
詢犄角爲表裏聲援郢州獲全朴特頗有力焉徵爲七
兵尚書至都未幾除豫州刺史尋進號撫軍將軍加散
騎常侍未之州還爲七兵尚書常侍如故武泰初詔詢
以本官兼侍中爲關右大使賞擢慕義之徒未及發會
尔朱榮入洛於河陰遇害年五十一贈侍中車騎大將
軍司空公雍州刺史謚曰貞烈無子

修弟務字陽仁少而聰慧舉秀才州辟主簿早卒

子美字師伯少有美名舉秀才州主簿太尉咸陽王雅相賞愛欲以女妻之美拒而不納除奉朝請亦早卒無子

務弟宣字叔令通辯博物早有聲譽少孤事母兄以孝友稱舉秀才至都見司空李訢與言自旦及夕訢嗟善不已司空李冲有人倫覽識見而重之高祖初徵爲尚書主客郎與蕭贍使顏幼明劉思效蕭琛范雲等對接轉都官郎邊負外散騎侍郎舊令與吏部郎同班闕高祖曾集沙門講佛經因命宣論難甚有理詣高祖稱善

遷都洛陽以宣爲採材副將奉使稱旨遙除司空諮議叅軍府解轉司州治中兼司徒右長史又轉別駕仍長史宣明敏有器幹搃攝州府事無凝滯遠近稱之世宗初除太中大夫領本郡中正仍別駕又爲司州都督遷太尉長史宣上言曰自遷都已來凡戰陳之處及軍罷兵還之道所有骸骼無人覆藏者請悉令州郡戍邏檢行埋掩并符出兵之鄉其家有死於戎役者使皆招魂復魄祔祭先靈復其年租調身被傷痍者免其兵役朝廷從之出爲征虜將軍益州刺史宣善於綏撫甚得羌戎之心後晉壽更置益州改宣所莅爲南秦州先是有

陰平氏酋楊孟孫擁戶數萬自立爲王通引蕭衍數爲
邊患宣乃遣使招喻曉以逆順孟孫感恩卽遣子詣闕
武興氏姜謨等千餘人上書乞延更限世宗嘉焉宣家
世以儒學爲業常慕廉退每嘆曰以賈誼之才仕漢文
之世不歷公卿將非運也乃謂親賓曰吾本閭閻之士
素無當世之志直隨牒推移遂至於此祿後養親道不
光國瞻言往哲可以言歸矣因表求解世宗不許乃作
懷田賦以叙心焉永平四年患篤世宗遣太醫令馳駟
就視并賜御藥宣素明陰陽之書自始患便知不起因
自剋亾日果如其言時年五十八世宗悼惜之贈左將

軍豫州刺史謚曰定尋改爲穆子敬憲莊伯並在文苑
傳

第四子獻伯武定末廷尉卿

馭從弟安祖少而聰慧年八九歲就師講詩至鹿鳴篇
語諸兄云鹿雖禽獸得食相呼而況人也自此之後未
曾獨食弱冠州辟主簿民有兄弟爭財詣州相訟安祖
召其兄弟以禮義責讓之此人兄弟明日相率謝罪內
外欽服之復有人勸其入仕安祖曰高尚之事非敢庶
幾且京師遼遠實憚於栖屑耳於是閑居養志不出城
邑安祖曾行值天熱舍於樹下鷲鳥逐雉雉急投之遂

觸樹而死安祖愍之乃取置陰地徐徐護視良久得蘇
安祖喜而放之後夜忽夢一丈夫衣冠甚偉著繡衣曲
領向安祖再拜安祖怪而問之此人云感君前日見放
故來謝德聞者異焉後高祖幸長安至河東存訪故老
安祖朝於蒲坂高祖與語甚悅仍拜安邑令安祖以老
病固辭詔給一時俸以供湯藥焉年八十三卒於家
子思濟亦有志操早卒

子宗賢

思濟弟幼儁卒於猗氏令

辛紹先隴西狄道人五世祖怡晉幽州刺史父淵私署

涼王李暠驍騎將軍暠子歆亦厚遇之歆與沮渠蒙遜
戰於蓼泉軍敗失馬淵以所乘馬授歆而身死於難以
義烈見稱西土世祖之平涼州紹先內徙家於晉陽明
敏有識量與廣平游明根范陽盧度世同郡李承等甚
相友善有至性丁父憂三年口不甘味頭不櫛沐髮遂
落盡故常着垂裙皂帽自中書博士轉神部令皇興中
薛安都以彭城歸國時朝廷欲綏安初附以紹先爲下
邳太守加寧朔將軍爲政不苟激察舉其大綱而已唯
教民治產禦賊之備及劉彧將陳顯達蕭道成蕭順之
來寇道成謂順之曰辛紹先未易侵也宜共慎之於是

不歷郡境遂徑屯呂梁太和十三年卒贈冠軍將軍并州刺史晉陽公謚曰惠

子鳳達耽道樂古有長者之名卒於京兆王子推國常侍

鳳達子祥字萬福舉司州秀才司空行參軍遷主簿太傅元丕爲并州刺史祥爲丕府屬勅行建興郡咸陽王禧妃卽祥妻妹及禧構逆親知多懼塵謗祥獨蕭然不預轉并州平北府司馬會刺史喪朝廷以其公清遂越長史勅行州事祥初在司馬有白璧還兵藥道顯被誣爲賊官屬推處咸以爲然祥曰道顯面有悲色察獄以

色其此之謂乎苦執申之月餘別獲真賊後除郢州龍驤府長史帶義陽太守白早生之反也蕭衍遣衆來援因此緣淮鎮戍相繼降沒唯祥堅城獨守蕭衍遣將胡武城陶平虜於州南金山之上連營侵逼衆情大懼祥從容曉喻人心遂安時出挑戰僞退以驕賊賊果日來攻逼不復自備乃夜出襲其營將曉矢刃交下賊大崩散潰擒平虜斬武城以送京師州境獲全論功方有賞授而刺史婁悅耻勲出其下聞之執政事竟不行胡賊劉龍駒作逆華州勅除祥華州安定王燮征虜府長史仍爲別將與討胡使薛和討滅之神龜元年卒時年五

十五永安二年贈冠軍將軍南青州刺史

長子琨字懷玉少聰敏解褐相州倉曹參軍稍遷陳郡太守輕車將軍濟州征虜府長史卒年四十六

琨弟懷仁武定末長樂太守

懷仁弟賁字叔文少有文學識度沈雅起家北中府中兵參軍負外散騎侍郎建義初修起居注除濟州撫軍府長史出帝時轉膠州車騎府長史遷平東將軍太師咸陽王坦開府長史武定中中尉崔暹表薦賁除

關太子

守吏民懷其恩惠還卒於鄴時年五十八

賁弟烈字季武歷太傅東閣祭酒卒於梁州鎮南府長

史

烈弟匡字季政頗有文學永安初釋褐封丘令加威烈將軍時經河陰之役朝士多求出外故匡爲之後除平遠將軍符璽郎中卒於龍驤將軍通直散騎侍郎時年三十五贈散騎常侍前將軍雍州刺史

祥弟少雍字季和少聰穎有孝行尤爲祖父紹先所愛紹先性嗜羊肝常呼少雍共食及紹先卒少雍終身不食肝性仁厚有禮義門內之法爲時所重釋褐奉朝請太學博士負外散騎侍郎司空高陽王雍引爲田曹參軍少雍性清正不憚彊禦積年久訟造次決之請託路

絕時稱賢明正始中詔百官各舉所知高陽王雍及吏部郎中李憲俱以少雍爲舉首選給事中侍中游肇後亦薦之會卒年四十二少雍妻王氏有德義與其從子懷仁兄弟同居懷仁等事之甚謹閨門禮讓人無比焉士大夫以此稱美

子元植武定中儀同府司馬

元植弟士遜太師開府功曹參軍

鳳達弟穆字叔宗舉茂才東雍州別駕初隨父在下邳與彭城陳敬文友善敬文弟敬武少爲沙門從師遠學經久不反敬文病臨卒以雜綾二十匹託穆與敬武穆

久訪不得經二十餘年始於洛陽見敬武以物還之封題如故世稱其廉信歷東荊州司馬轉長史帶義陽太守領戍雅有恤民之稱轉汝陽太守值水澇民飢上表請輕租賦帝從之遂勅汝陽一郡聽以小絹爲調遷中散大夫加龍驤將軍正光四年以老啟求致仕詔引見謂穆志力尚可除平原相穆善撫導民吏懷之孝昌二年徵爲征虜將軍太中大夫未發卒於郡年七十七贈後將軍幽州刺史謚曰貞

長子子馥字元頴早有學行孝昌初釋褐南司州龍驤府錄事參軍丁父艱居喪有禮後除給事中南冀州防

城都督素爲莊帝所知識及卽位除宣威將軍尚書右
主客郎中持節爲南濟冀濟青四州慰勞使尋除寧朔
將軍負外散騎常侍仍領郎中太宰元天穆征邢杲引
爲行臺郎中尋除平原相子馥父子並爲此郡吏民懷
安之元顥入洛子馥不受其赦刺史元仲景附顥拘子
馥并禁家口莊帝反政詔封三門縣開國男食邑二百
戶天平中爲東南道行臺左丞徐州開府長史入除太
尉府司馬長白山連接三齊瑕丘數州之界多有盜賊
子馥受使檢覆因辨山谷要害宜立鎮戍之所又諸州
豪石在山鼓鑄姦黨多依之又得密造兵仗亦請破罷

治朝廷善而從之還除尚書右丞出爲清河太守武
八年卒於郡子馥以三傳經同說異遂總爲一部傳
江並出校比短長會亾未就

子德維武定末司徒行參軍

子馥弟子華字仲夷天平中右光祿大夫

柳崇字僧生河東解人也七世祖軌晉廷尉卿崇方雅
有器量身長八尺美鬚明目兼有學行舉秀才射策高
第解褐太尉主簿尚書右外兵郎中于時河東河北二
郡爭境其間有鹽池之饒虞坂之便守宰及民皆恐外
割公私朋競紛囂臺府高祖乃遣崇檢斷民官息訟屬

荆郢新附南寇窺擾又詔崇持節與州郡經略兼加慰
喻還遷太子洗馬本郡邑中正轉中壘將軍散騎侍郎
遷司空司馬兼衛尉少卿又領邑中正出爲河北太守
崇初屆郡郡民張明失馬疑十餘人崇見之不問賊事
人人別借以溫顏更問其親老存不農桑多少而微察
其辭色卽獲真賊呂穆等二人餘皆放遣郡中畏服境
內帖然卒於官年五十六贈輔國將軍岐州刺史謚曰
穆崇所製文章寇亂遺失
長子慶和性沉靜不競於時起家奉朝請稍遷輕車將
軍給事中本郡邑中正卒

子德逸武定末齊王丞相府主簿

慶和弟楷字孝則身長八尺善草書頗涉文史解褐負

外散騎侍郎蕭

關

西征引爲車騎主簿仍爲行臺郎中

征還以負外郎領殿中侍御史轉太尉記室參軍遷寧

遠將軍通直散騎侍郎本郡邑中正普泰初簡定集書

省官出除征虜將軍司徒從事中書郎轉儀同開府長

史天平中爲肆州驃騎府長史頗有聲譽又加中軍將

軍興和中撫軍司馬遇病卒

崇從父弟元章姿貌魁偉歷太尉中兵參軍司空錄事

司徒從事中郎遷相州平東府長史屬刺史元熙起兵

欲除元乂元章與魏郡太守李孝怡等執熙賜爵猗氏伯除正平太守後靈太后反政削除官爵卒於家

崇族弟敬起字華之起家中書博士轉城陽王文學除寧遠將軍尚書儀曹郎中龍驤將軍平陽太守卒有五子

長子永字神護性麤率解褐奉朝請轉員外散騎侍郎除太尉記室參軍遷諫議大夫又轉征虜將軍太中大夫本郡邑中正以母老解官歸養卒於家贈征西將軍秦州刺史

永弟暢字叔智自奉朝請三遷伏波將軍岐州征虜府長史遷征虜將軍魯陽太守還除左將軍太中大夫轉安東將軍光祿大夫卒贈衛大將軍雍州刺史謚曰穆暢弟範字洪禮卒於前將軍給事中本州大中正範弟粹字季義出後叔仲起武定末平東後軍遷遼西太守

敬起弟仲起字紹隆舉秀才咸陽王禧爲牧辟西曹書佐無子兄子粹繼之

崇族子儁起少有志尚解褐奉朝請轉太尉默曹參軍伏波將軍司徒倉曹參軍卒

長子達摩武定末陽城太守

儁起從父弟援字乾護身長八尺儀望甚偉解褐太尉
鎧曹參軍轉護軍司馬稍遷冠軍將軍司空長史轉廷
尉少卿出除安西將軍南秦州刺史尋爲散騎常侍鎮
軍將軍轉征西將軍金紫光祿大夫遷車騎將軍右光
祿大夫卒贈本將軍秦州刺史

子長柔武定末青州驃騎府中兵參軍
援從父弟仲景汝南王悅常侍

史臣曰韋杜舊族門風名亦不殞裴辛柳氏素業有資
器行仍世所以布於列位不替其美

列傳第三十三

魏書四十五

